

大方廣佛華嚴經普賢行願品
妙法蓮華經觀世音菩薩普門品
地藏菩薩本願經

心不離佛

佛不離心

南無阿彌陀佛

念念相續

無有間斷

大方廣佛華嚴經普賢行願品

唐闕賓國三藏般若奉詔譯

爾時普賢菩薩摩訶薩。稱歎如來勝功德已。告諸菩薩及善財言。善男子。如來功德。假使十方一切諸佛。經不可說不可說佛剎極微塵數劫。相續演說。不可窮盡。若欲成就此功德門。應修十種廣大行願。何等爲十。一者禮敬諸佛。二者稱讚如來。三者廣修供養。四者懺悔業障。五者隨喜功德。六者請轉法輪。七者請佛住世。八者常隨佛學。九者恆順衆生。十者普皆迴向。善財白言。大聖。云何禮敬乃至迴向。普賢菩薩告善財言。善男子。言禮敬諸佛者。所有盡法界虛空界。十方三世一切佛剎極微塵數諸佛世尊。我以普賢行願力故。深心信解。如對目前。悉以清淨身語意業。常修禮敬。一一佛所。皆現不可說不可說佛剎極微塵數身。一一身。徧禮不可說不可說佛剎極微塵數佛。虛空界盡。我禮乃盡。而虛空界不可盡故。我此禮敬。無有窮盡。如是乃至衆生界盡。衆生業盡。衆生煩惱盡。我禮乃盡。而衆生界乃至煩惱。無有盡故。我此禮敬。無有窮盡。念念相續。無有間斷。身語意業。無有疲厭。

復次。善男子。言稱讚如來者。所有盡法界虛空界。十方三世一切剎土。所有極微一一塵中。皆有一切世界極微塵數佛。一一佛所。皆有菩薩海會圍遶。我當悉以甚深勝解。現前知見。各以出過辯才。天女微妙舌根。一一舌根。出無盡音聲海。一一音聲。出一切言辭海。稱揚讚歎一切如來諸功德海。窮未來際。相續不斷。盡於法界。無不周徧。如是虛空界盡。衆生界盡。衆生業盡。衆生煩惱盡。我讚乃盡。而虛空界乃至煩惱。

惱。無有盡故。我此讚歎。無有窮盡。念念相續。無有間斷。身語意業。無有疲厭。

復次。善男子。言廣修供養者。所有盡法界虛空界。十方三世一切佛刹極微塵中。一一各有一切世界極微塵數佛。一一佛所。種種菩薩海會圍遶。我以普賢行願力故。起深信解。現前知見。悉以上妙諸供養具。而爲供養。所謂華雲鬘雲。天音樂雲。天傘蓋雲。天衣服雲。天種種香。塗香。燒香。末香。如是等雲。一一量如須彌山王。然種種燈。酥燈。油燈。諸香油燈。一一燈炷如須彌山。一一燈油如大海水。以如是等諸供養具。常爲供養。善男子。諸供養中。法供養最。所謂如說修行供養。利益衆生供養。攝受衆生供養。代衆生苦供養。勤修善根供養。不捨菩薩業供養。不離菩提心供養。善男子。如前供養無量功德。比法供養一念功德。百分不及一。千分不及一。百千俱胝那由他分。迦羅分。算分。數分。喻分。優波尼沙陀分。亦不及一。何以故。以諸如來尊重法故。以如說行。出生諸佛故。若諸菩薩行法供養。則得成就供養如來。如是修行。是真供養故。此廣大最勝供養。虛空界盡。衆生界盡。衆生業盡。衆生煩惱盡。我供乃盡。而虛空界乃至煩惱不可盡故。我此供養亦無有盡。念念相續。無有間斷。身語意業。無有疲厭。

復次。善男子。言懺悔業障者。菩薩自念。我於過去無始劫中。由貪瞋癡。發身口意。作諸惡業。無量無邊。若此惡業有體相者。盡虛空界不能容受。我今悉以清淨三業。徧於法界極微塵刹。一切諸佛菩薩衆前。誠心懺悔。後不復造。恆住淨戒。一切功德。如是虛空界盡。衆生界盡。衆生業盡。衆生煩惱盡。我懺乃盡。而虛空界乃至衆生煩惱不可盡故。我此懺悔無有窮盡。念念相續。無有間斷。身語意業。無有疲厭。

復次。善男子。言隨喜功德者。所有盡法界虛空界。十方三世一切佛刹極微塵數諸佛如來。從初發心。爲一切智。勤修福聚。不惜身命。經不可說不可說佛刹極微塵數劫。一一劫中。捨不可說不可說佛刹極微塵數頭目手足。如是一切難行苦行。圓滿種種波羅蜜門。證入種種菩薩智地。成就諸佛無上菩提。及般涅槃。分布舍利。所有善根。我皆隨喜。及彼十方一切世界。六趣四生。一切種類。所有功德。乃至一塵。我皆隨喜。十方三世一切聲聞。及辟支佛。有學無學。所有功德。我皆隨喜。一切菩薩所修無量難行苦行。志求無上正等菩提。廣大功德。我皆隨喜。如是虛空界盡。衆生界盡。衆生業盡。衆生煩惱盡。我此隨喜。無有窮盡。念念相續。無有間斷。身語意業。無有疲厭。

復次。善男子。言請轉法輪者。所有盡法界虛空界。十方三世一切佛刹極微塵中。一一各有不可說不可說佛刹極微塵數。廣大佛刹。一一刹中。念念有不可說不可說佛刹極微塵數。一切諸佛成等正覺。一切菩薩海會圍遶。而我悉以身口意業種種方便。殷勤勸請轉妙法輪。如是虛空界盡。衆生界盡。衆生業盡。衆生煩惱盡。我常勸請一切諸佛轉正法輪。無有窮盡。念念相續。無有間斷。身語意業。無有疲厭。復次。善男子。言請佛住世者。所有盡法界虛空界。十方三世一切佛刹極微塵數諸佛如來。將欲示現般涅槃者。及諸菩薩聲聞緣覺。有學無學。乃至一切諸善知識。我悉勸請莫入涅槃。經於一切佛刹極微塵數劫。爲欲利樂一切衆生。如是虛空界盡。衆生界盡。衆生業盡。衆生煩惱盡。我此勸請。無有窮盡。念念相續。無有間斷。身語意業。無有疲厭。

復次。善男子。言常隨佛學者。如此娑婆世界毗盧遮那如來。從初發心。精進不退。以不可說不可說身命而爲布施。剝皮爲紙。析骨爲筆。刺血爲墨。書寫經典。積如須彌。爲重法故。不惜身命。何況王位城邑聚落宮殿園林一切所有。及餘種種難行苦行。乃至樹下成大菩提。示種種神通。起種種變化。現種種佛身。處種種衆會。或處一切諸大菩薩衆會道場。或處聲聞及辟支佛衆會道場。或處轉輪聖王小王眷屬衆會道場。或處刹利及婆羅門長者居士衆會道場。乃至或處天龍八部人非人等衆會道場。處於如是種種衆會。以圓滿音。如大雷震。隨其樂欲。成熟衆生。乃至示現入於涅槃。如是一切我皆隨學。如今世尊毗盧遮那如是。盡法界虛空界。十方三世一切佛刹。所有塵中一切如來。皆亦如是。於念念中。我皆隨學。如是虛空界盡。衆生界盡。衆生業盡。衆生煩惱盡。我此隨學。無有窮盡。念念相續。無有間斷。身語意業。無有疲厭。

復次。善男子。言恆順衆生者。謂盡法界虛空界。十方刹海所有衆生。種種差別。所謂卵生。胎生。濕生。化生。或有依於地水火風而生住者。或有依空及諸卉木而生住者。種種生類。種種色身。種種形狀。種種相貌。種種壽量。種種族類。種種名號。種種心性。種種知見。種種欲樂。種種意行。種種威儀。種種衣服。種種飲食。處於種種村營聚落城邑宮殿。乃至一切天龍八部人非人等。無足二足四足多足。有色無色。有想無想。非有想。非無想。如是等類。我皆於彼隨順而轉。種種承事。種種供養。如敬父母。如奉師長。及阿羅漢。乃至如來。等無有異。於諸病苦。爲作良醫。於失道者。示其正路。於闇夜中。爲作光明。於貧窮者。令得伏藏。菩薩

如是平等饒益一切衆生。何以故。菩薩若能隨順衆生。則爲隨順供養諸佛。若於衆生尊重承事。則爲尊重承事如來。若令衆生歡喜者。則令一切如來歡喜。何以故。諸佛如來。以大悲心而爲體故。因於衆生而起大悲。因於大悲生菩提心。因菩提心成等正覺。譬如曠野沙磧之中。有大樹王。若根得水。枝葉華果。悉皆繁茂。生死曠野。菩提樹王。亦復如是。一切衆生而爲樹根。諸佛菩薩而爲華果。以大悲水饒益衆生。則能成就諸佛菩薩智慧華果。何以故。若諸菩薩以大悲水饒益衆生。則能成就阿耨多羅三藐三菩提。是故菩提屬於衆生。若無衆生。一切菩薩終不能成無上正覺。善男子。汝於此義。應如是解。以於衆生心平等故。則能成就圓滿大悲。以大悲心隨衆生故。則能成就供養如來。菩薩如是隨順衆生。虛空界盡。衆生界盡。衆生業盡。衆生煩惱盡。我此隨順無有窮盡。念念相續。無有間斷。身語意業。無有疲厭。復次。善男子。言普皆迴向者。從初禮拜乃至隨順。所有功德。皆悉迴向盡法界虛空界一切衆生。願令衆生常得安樂。無諸病苦。欲行惡法。皆悉不成。所修善業。皆速成就。關閉一切諸惡趣門。開示人天涅槃正路。若諸衆生。因其積集諸惡業故。所感一切極重苦果。我皆代受。令彼衆生悉得解脫。究竟成就無上菩提。菩薩如是所修迴向。虛空界盡。衆生界盡。衆生業盡。衆生煩惱盡。我此迴向無有窮盡。念念相續。無有間斷。身語意業。無有疲厭。

善男子。是爲菩薩摩訶薩十種大願。具足圓滿。若諸菩薩於此大願隨順趣入。則能成熟一切衆生。則能隨順阿耨多羅三藐三菩提。則能成滿普賢菩薩諸行願海。是故善男子。汝於此義。應如是知。若有善男

子善女人。以滿十方無量無邊不可說不可說佛刹極微塵數一切世界上妙七寶。及諸人天最勝安樂。布施爾所一切世界所有衆生。供養爾所一切世界諸佛菩薩。經爾所佛刹極微塵數劫。相續不斷。所得功德。若復有人。聞此願王。一經於耳。所有功德。比前功德。百分不及一。千分不及一。乃至優波尼沙陀。分亦不及一。或復有人。以深信心。於此大願受持讀誦。乃至書寫一四句偈。速能除滅五無間業。所有世間身心等病。種種苦惱。乃至佛刹極微塵數一切惡業。皆得消除。一切魔軍。夜叉羅刹。若鳩槃荼。若毗舍闍。若部多等。飲血啖肉諸惡鬼神。皆悉遠離。或時發心親近守護。是故若人誦此願者。行於世間。無有障礙。如空中月。出於雲翳。諸佛菩薩之所稱讚。一切人天皆應禮敬。一切衆生悉應供養。此善男子善得人身。圓滿普賢所有功德。不久當如普賢菩薩。速得成就微妙色身。具三十二大丈夫相。若生人天。所在之處。常居勝族。悉能破壞一切惡趣。悉能遠離一切惡友。悉能制伏一切外道。悉能解脫一切煩惱。如師子王。摧伏羣獸。堪受一切衆生供養。又復是人。臨命終時。最後剎那。一切諸根悉皆散壞。一切親屬悉皆捨離。一切威勢悉皆退失。輔相大臣。宮城內外。象馬車乘。珍寶伏藏。如是一切。無復相隨。唯此願王。不相捨離。於一切時。引導其前。一剎那中。卽得往生極樂世界。到已。卽見阿彌陀佛。文殊師利菩薩。普賢菩薩。觀自在菩薩。彌勒菩薩等。此諸菩薩。色相端嚴。功德具足。所共圍遶。其人自見生蓮華中。蒙佛授記。得授記已。經於無數百千萬億那由他劫。普於十方不可說不可說世界。以智慧力。隨衆生心。而爲利益。不久當坐菩提道場。降伏魔軍。成等正覺。轉妙法輪。能令佛刹極微塵數世界衆生。發菩提心。隨其根性。教化成熟。

乃至盡於未來劫海。廣能利益一切衆生。善男子。彼諸衆生。若聞若信此大願王。受持讀誦。廣爲人說。所有功德。除佛世尊。餘無知者。是故汝等聞此願王。莫生疑念。應當諦受。受已能讀。讀已能誦。誦已能持。乃至書寫。廣爲人說。是諸人等。於一念中。所有行願。皆得成就。所獲福聚。無量無邊。能於煩惱大苦海中。拔濟衆生。令其出離。皆得往生阿彌陀佛極樂世界。爾時普賢菩薩摩訶薩。欲重宣此義。普觀十方而說偈言。

所有十方世界中	三世一切人師子	我以清淨身語意	一切徧禮盡無餘
普賢行願威神力	普現一切如來前	一身復現刹塵身	一一徧禮刹塵佛
於一塵中塵數佛	各處菩薩衆會中	無盡法界塵亦然	深信諸佛皆充滿
各以一切音聲海	普出無盡妙言辭	盡於未來一切劫	讚佛甚深功德海
以諸最勝妙華鬘	伎樂塗香及傘蓋	如是最勝莊嚴具	我以供養諸如來
最勝衣服最勝香	末香燒香與燈燭	一一皆如妙高聚	我悉供養諸如來
我以廣大勝解心	深信一切三世佛	悉以普賢行願力	普徧供養諸如來
我昔所造諸惡業	皆由無始貪瞋癡	從身語意之所生	一切我今皆懺悔
十方一切諸衆生	二乘有學及無學	一切如來與菩薩	所有功德皆隨喜
十方所有世間燈	最初成就菩提者	我今一切皆勸請	轉於無上妙法輪

諸佛若欲示涅槃 我悉至誠而勸請
所有禮讚供養福 請佛住世轉法輪
我隨一切如來學 修習普賢圓滿行
未來一切天人師 一切意樂皆圓滿
所有十方一切刹 廣大清淨妙莊嚴
十方所有諸衆生 願離憂患常安樂
我爲菩提修行時 一切趣中成宿命
天龍夜叉鳩槃荼 乃至人與非人等
勤修清淨波羅蜜 恆不忘失菩提心
於諸惡業及魔境 世間道中得解脫
悉除一切惡道苦 等與一切羣生樂
我常隨順諸衆生 盡於未來一切劫
所有與我同行者 於一切處同集會
所有益我善知識 爲我顯示普賢行
願常面見諸如來 及諸佛子衆圍遶
唯願久住刹塵劫 利樂一切諸衆生
隨喜懺悔諸善根 迴向衆生及六道
供養過去諸如來 及與現在十方佛
我願普隨三世學 速得成就大菩提
衆會圍遶諸如來 悉在菩提樹王下
獲得甚深正法利 滅除煩惱盡無餘
常得出家修淨戒 無垢無破無穿漏
所有一切衆生語 悉以諸音而說法
滅除障垢無有餘 一切妙行皆成就
猶如蓮華不著水 亦如日月不住空
如是經於刹塵劫 十方利益恆無盡
恆修普賢廣大行 圓滿無上大菩提
身口意業皆同等 一切行願同修學
常願與我同集會 於我常生歡喜心
於彼皆興廣大供 盡未來劫無疲厭

願持諸佛微妙法	光顯一切菩提行	究竟清淨普賢道	盡未來劫常修習
我於一切諸有中	所修福智恆無盡	定慧方便及解脫	獲諸無盡功德藏
一塵中有塵數刹	一一刹有難思佛	一一佛處衆會中	我見恆演菩提行
普盡十方諸刹海	一一毛端三世海	佛海及與國土海	我徧修行經劫海
一切如來語清淨	一言具衆音聲海	隨諸衆生意樂音	一流佛辯才海
三世一切諸如來	於彼無盡語言海	恆轉理趣妙法輪	我深智力普能入
我能深入於未來	盡一切劫爲一念	三世所有一切劫	爲一念際我皆入
我於一念見三世	所有一切人師子	亦常人佛境界中	如幻解脫及威力
於一毛端極微中	出現三世莊嚴刹	十方塵刹諸毛端	我皆深入而嚴淨
所有未來照世燈	成道轉法悟羣有	究竟佛事示涅槃	我皆往詣而親近
速疾周徧神通力	普門徧入大乘力	智行普修功德力	威神普覆大慈力
徧淨莊嚴勝福力	無著無依智慧力	定慧方便威神力	普能積集菩提力
清淨一切善業力	摧滅一切煩惱力	降伏一切諸魔力	圓滿普賢諸行力
普能嚴淨諸刹海	解脫一切衆生海	善能分別諸法海	能甚深入智慧海
普能清淨諸行海	圓滿一切諸願海	親近供養諸佛海	修行無倦經劫海

三世一切諸如來	最勝菩提諸行願	我皆供養圓滿修	以普賢行悟菩提
一切如來有長子	彼名號曰普賢尊	我今迴向諸善根	願諸智行悉同彼
願身口意恆清淨	諸行剎土亦復然	如是智慧號普賢	願我與彼皆同等
我爲徧淨普賢行	文殊師利諸大願	滿彼事業盡無餘	未來際劫恆無倦
我所修行無有量	獲得無量諸功德	安住無量諸行中	了達一切神通力
文殊師利勇猛智	普賢慧行亦復然	我今迴向諸善根	隨彼一切常修學
三世諸佛所稱歎	如是最勝諸大願	我今迴向諸善根	爲得普賢殊勝行
願我臨欲命終時	盡除一切諸障礙	面見彼佛阿彌陀	卽得往生安樂剎
我旣往生彼國已	現前成就此大願	一切圓滿盡無餘	利樂一切衆生界
彼佛衆會咸清淨	我時於勝蓮華生	親覩如來無量光	現前授我菩提記
蒙彼如來授記已	化身無數百俱胝	智力廣大徧十方	普利一切衆生界
乃至虛空世界盡	衆生及業煩惱盡	如是一切無盡時	我願究竟恆無盡
十方所有無邊剎	莊嚴衆寶供如來	最勝安樂施天人	經一切剎微塵劫
若人於此勝願王	一經於耳能生信	求勝菩提心渴仰	獲勝功德過於彼
卽常遠離惡知識	永離一切諸惡道	速見如來無量光	具此普賢最勝願

此人善得勝壽命 此人善來人中生 此人不久當成就 如彼普賢菩薩行

往昔由無智慧力 所造極惡五無間 誦此普賢大願王 一念速疾皆消滅

族姓種類及容色 相好智慧咸圓滿 諸魔外道不能摧 堪為三界所應供

速詣菩提大樹王 坐已降伏諸魔衆 成等正覺轉法輪 普利一切諸含識

若人於此普賢願 讀誦受持及演說 果報唯佛能證知 決定獲勝菩提道

若人誦此普賢願 我說少分之善根 一念一切悉皆圓 成就衆生清淨願

我此普賢殊勝行 無邊勝福皆迴向 普願沈溺諸衆生 速往無量光佛刹

爾時普賢菩薩摩訶薩。於如來前。說此普賢廣大願王清淨偈已。善財童子踊躍無量。一切菩薩皆大歡喜。如來讚言。善哉善哉。爾時世尊。與諸聖者菩薩摩訶薩。演說如是不可思議解脫境界勝法門時。文殊師利菩薩而爲上首。諸大菩薩。及所成熟六千比丘。彌勒菩薩而爲上首。賢劫一切諸大菩薩。無垢普賢菩薩而爲上首。一生補處。住灌頂位。諸大菩薩。及餘十方種種世界。普來集會。一切利海。極微塵數諸菩薩摩訶薩衆。大智舍利弗。摩訶目犍連等。而爲上首。諸大聲聞。并諸人天。一切世主。天龍。夜叉。乾闥婆。阿脩羅。迦樓羅。緊那羅。摩睺羅伽。人非人等。一切大眾。聞佛所說。皆大歡喜。信受奉行。

大方廣佛華嚴經普賢行願品

略注○【大方廣佛華嚴經】略稱華嚴經。八十卷(唐實叉難陀譯)。四十卷(即普賢宣說廣大甚深之法。故名。華。同花。爲入不思

謝表。安曰。余了不知。蓋華嚴力也。若欲除免。但令懺悔。如語教之。方蒙解脫。

宋君石僧。別名苦行居士。前供職京滬鐵路。自言在洛計車站時。有一日夜間。滬

常車到站。余正在月台上辦公。那時有一個好僕職於水上警察的巡官。望見有一個好

佛的模樣。立在余的身旁。頭帶荷花帽。手執錫杖。面有白鬚。當日並未語余。三

日後。伊特來訪余。先通姓名。繼則問余信何宗教。余告以信佛。不過念一句南無

阿彌陀佛。伊遂將三日以前所見之事實告余。勸此可信佛。經上說。念佛的人平常有

鬼神護佑的說。確實不虛。(廣長舌)

北通州王鐵珊者。前清曾作廣西藩憲。其時廣西土匪甚多。彼於作兵備道時。即設

計勦滅其黨。所殺甚多。四年前得病甚重。一合眼。即見在黑屋中。其屋甚大。又甚

黑。有鬼無數。皆來逼迫。遂即驚醒。久則復合眼。其境仍如是。復驚醒。三晝夜不

敢合眼。其人已在奄奄一息。其妻因諭之曰。你如此。怎麼樣好。你念南無阿彌陀佛

吧。念佛總會好。鐵珊一聞此言。遂拈佛念。未久。即睡著。遂睡一大覺。了無境界

可得。而病亦漸癒矣。因長齋念佛。鐵珊前年與陳錫周來山。親與光說。(印光法師文鈔)

李文啓居士。上海廣東路三五九號孔明電料行主。勤修六度。舉凡弘法利生之事

悉力以赴。彌為奮勵。自言。未信佛前。於醫藥上患雜症。劇症難忍。狂搔皮破

。每致血赤淋漓。睡在被窩中。熱脹癢痛。尤為苦楚。如是者達五年之久。百藥莫

效。某醫為合藥水一瓶。試敷患部之半。不料如法澆水。腎毒銷蝕幾穿。即往廣慈

醫院住療半月。藥水之蝕傷雖愈。而瘋癩依然。旋晤李開澤居士。具道所苦。開澤

居士為言。今有一法。持不知你有無福分信受。即吃素念佛是。余說。吃素念佛原

來是要有福分的。我決心實行。不到一個月。劇癢全止。到第二個月。患部堆厚平

薄。多年痼疾竟自摧然。始信佛為大醫王。倘非虛語云。(保安法稿本)

上海菩薩主人。崇奉三寶行菩薩道。博施財法。在餘姚路。設有大陸造紙廠一所。民國三十四年五月十一日下午四時許。

餘姚路發生大火。計燒去草棚三千餘間。工廠十餘家。街堂兩條。死傷十餘人。當

燒至該廠時。風忽轉向。火即延燒他處。在一片焦土中。該廠如魯靈光之屹然獨

存。且該廠並無高牆之阻隔。廠內又多草房。極易起火。幸蒙幸免。非特回祿有靈

實仗我佛威神加被(同上)

上海南行居士。奉佛如素。二十餘年。禮誦經。並發大心。行善寶願。設三樂糖菓。版於南市中。華路七九九號。家居焉。於民國三十四年四月間。三歲之幼孫。於庭中獨玩。忽墮井中。井距居室頗遠。家人莫聞。有一工人。午睡方覺。適經甕手。不自知其所以然。手中乃握一巨繩。聞井中兒

聲。即繫繩於井開而鉤下。兒抱工人之足而出。竟得無恙。在同一時間中。附近小兒之墮井者。有四人之多。其他三人均不救。醫手何用巨繩。而竟騰行。時間均如此湊合。可知念佛行善之家。常為諸佛菩薩所攝護云云。實信而有徵。(同上)

佛示念佛十種功德 法苑珠林卷第六

- 一 若人持佛名號者。當經十種功德利益。一晝夜常得諸天大力神將。并諸眷屬。
- 二 常得二十五菩薩如觀世音等。及一切菩薩常隨守護。
- 三 常為諸佛晝夜護念。阿彌陀佛常放光明。攝受此人。
- 四 一切惡鬼若夜叉羅刹。皆不能害。一切毒蛇毒龍毒藥。悉不能中。
- 五 一切火難水難怨賊刀箭牢獄枷鎖。
- 六 先所作罪。悉皆消滅。所殺怨命。咸蒙解脫。更無執對。
- 七 夜夢正直。或復夢見阿彌陀佛勝妙色身。
- 八 心常歡喜。顏色光澤。氣力充盛。所作吉利。
- 九 常為世間人民恭敬供養。歡喜禮拜。猶如敬佛。
- 十 命終時。心無怖畏。正念現前。得見阿彌陀佛。并諸菩薩。手持金臺。接引往生西方淨土。盡未來際。受勝妙樂。

妙法蓮華經觀世音菩薩普門品

姚秦龜茲國三藏法師鳩摩羅什譯

爾時無盡意菩薩。卽從座起。偏袒右肩。合掌向佛。而作是言。世尊。觀世音菩薩。以何因緣。名觀世音。佛告無盡意菩薩。善男子。若有無量百千萬億衆生。受諸苦惱。聞是觀世音菩薩。一心稱名。觀世音菩薩。卽時觀其音聲。皆得解脫。若有持是觀世音菩薩名者。設入大火。火不能燒。由是菩薩威神力故。若爲大水所漂。稱其名號。卽得淺處。若有百千萬億衆生。爲求金銀。琉璃。碑磬。瑪瑙。珊瑚。琥珀。眞珠等寶。入於大海。假使黑風吹其船舫。飄墮羅刹鬼國。其中若有乃至一人。稱觀世音菩薩名者。是諸人等。皆得解脫。羅刹之難。以是因緣。名觀世音。若復有人。臨當被害。稱觀世音菩薩名者。彼所執刀杖。尋段段壞。而得解脫。若三千大千國土。滿中夜叉羅刹。欲來惱人。聞其稱觀世音菩薩名者。是諸惡鬼。尙不能以惡眼視之。況復加害。設復有人。若有罪。若無罪。桎械枷鎖。繫其身。稱觀世音菩薩名者。皆悉斷壞。卽得解脫。若三千大千國土。滿中怨賊。有一商主。將諸商人。齎持重寶。經過險路。其中一人。作是唱言。諸善男子。勿得恐怖。汝等應當一心稱觀世音菩薩名號。是菩薩能以無畏。施於衆生。汝等若稱名者。於此怨賊。當得解脫。衆商人聞。俱發聲言。南無觀世音菩薩。稱其名故。卽得解脫。無盡意。觀世音菩薩摩訶薩。威神之力。巍巍如是。若有衆生。多於姪欲。常念恭敬觀世音菩薩。便得離欲。若多瞋恚。常念恭敬觀世音菩薩。便得離瞋。若多愚癡。常念恭敬觀世音菩薩。便得離癡。無盡意。觀世音菩薩。有如是等大威神力。多所饒益。是故衆生。常應心念。若有女人。設欲求男。禮拜供養觀世音菩薩。便生福德智慧之男。設欲求女。便生端正有相之女。宿

植德本。衆人愛敬。無盡意。觀世音菩薩。有如是力。若有衆生。恭敬禮拜觀世音菩薩。福不唐捐。是故衆生。皆應受持觀世音菩薩名號。無盡意。若有人受持六十二億恆河沙菩薩名字。復盡形供養飲食衣服臥具醫藥。於汝意云何。是善男子善女人。功德多不。無盡意言。甚多。世尊。佛言。若復有人。受持觀世音菩薩名號。乃至一時禮拜供養。是二人福。正等無異。於百千萬億劫。不可窮盡。無盡意。受持觀世音菩薩名號。得如是無量無邊福德之利。無盡意菩薩白佛言。世尊。觀世音菩薩云何遊此娑婆世界。云何而爲衆生說法。方便之力。其事云何。佛告無盡意菩薩。善男子。若有國土衆生。應以佛身得度者。觀世音菩薩卽現佛身而爲說法。應以辟支佛身得度者。卽現辟支佛身而爲說法。應以聲聞身得度者。卽現聲聞身而爲說法。應以梵王身得度者。卽現梵王身而爲說法。應以帝釋身得度者。卽現帝釋身而爲說法。應以自在天身得度者。卽現自在天身而爲說法。應以大自在天身得度者。卽現大自在天身而爲說法。應以天大將軍身得度者。卽現天大將軍身而爲說法。應以毗沙門身得度者。卽現毗沙門身而爲說法。應以小王身得度者。卽現小王身而爲說法。應以長者身得度者。卽現長者身而爲說法。應以居士身得度者。卽現居士身而爲說法。應以宰官身得度者。卽現宰官身而爲說法。應以婆羅門身得度者。卽現婆羅門身而爲說法。應以比丘比丘尼。優婆塞。優婆夷身得度者。卽現比丘比丘尼。優婆塞。優婆夷身而爲說法。應以長者居士宰官。婆羅門婦女身得度者。卽現婦女身而爲說法。應以童男童女身得度者。卽現童男童女身而爲說法。應以天龍。夜叉。乾闥婆。阿脩羅。迦樓羅。緊那羅。摩睺羅伽。人非人等身得度者。卽皆現之而

爲說法應以執金剛神得度者。卽現執金剛神而爲說法。無盡意。是觀世音菩薩成就如是功德。以種種形。遊諸國土。度脫衆生。是故汝等應當一心供養觀世音菩薩。是觀世音菩薩摩訶薩。於怖畏急難之中。能施無畏。是故此娑婆世界皆號之爲施無畏者。無盡意菩薩白佛言。世尊。我今當供養觀世音菩薩。卽解頸衆寶珠瓔珞。價值百千兩金。而以與之。作是言。仁者受此法施珍寶瓔珞。時觀世音菩薩不肯受之。無盡意復白觀世音菩薩言。仁者愍我等故。受此瓔珞。爾時佛告觀世音菩薩。當愍此無盡意菩薩。及四衆。天龍。夜叉。乾闥婆。阿脩羅。迦樓羅。緊那羅。摩睺羅伽。人非人等。受是瓔珞。卽時觀世音菩薩愍諸四衆。及於天龍。人非人等。受其瓔珞。分作二分。一分奉釋迦牟尼佛。一分奉多寶佛塔。無盡意。觀世音菩薩有如是自在神力。遊於娑婆世界。爾時無盡意菩薩。以偈問曰。

世尊妙相具	我今重問彼	佛子何因緣	名爲觀世音	具足妙相尊	偈答無盡意
汝聽觀音行	善應諸方所	弘誓深如海	歷劫不思議	侍多千億佛	發大清淨願
我爲汝略說	聞名及見身	心心不空過	能滅諸有苦	假使興害意	推落大火坑
念彼觀音力	火坑變成池	或漂流巨海	龍魚諸鬼難	念彼觀音力	波浪不能沒
或在須彌峯	爲人所推墮	念彼觀音力	如日虛空住	或被惡人逐	墮落金剛山
念彼觀音力	不能損一毛	或值怨賊繞	各執刀加害	念彼觀音力	咸卽起慈心
或遭王難苦	臨刑欲壽終	念彼觀音力	刀尋段段壞	或囚禁枷鎖	手足被杻械

念彼觀音力	釋然得解脫	呪詛諸毒藥	所欲害身者	念彼觀音力	彼卽轉迴去
或遇惡羅刹	毒龍諸鬼等	念彼觀音力	時悉不敢害	若惡獸圍繞	利牙爪可怖
念彼觀音力	疾走無邊方	旣蛇及蝮蠍	氣毒煙火然	念彼觀音力	尋聲自迴去
雲雷鼓掣電	降雹澍大雨	念彼觀音力	應時得消散	衆生被困厄	無量苦逼身
觀音妙智力	能救世間苦	具足神通力	廣修智方便	十方諸國土	無刹不現身
種種諸惡趣	地獄鬼畜生	生老病死苦	以漸悉令滅	真觀清淨觀	廣大智慧觀
悲觀及慈觀	常願常瞻仰	無垢清淨光	慧日破諸闇	能伏災風火	普明照世間
悲體戒雷震	慈愍妙大雲	澍甘露法雨	滅除煩惱燄	諍訟經官處	怖畏軍陣中
念彼觀音力	衆怨悉退散	妙音觀世音	梵音海潮音	勝彼世間音	是故須常念
念念勿生疑	觀世音淨聖	於苦惱死厄	能爲作依怙	具一切功德	慈眼視衆生
福聚海無量	是故應頂禮				

爾時持地菩薩。卽從座起。前白佛言。世尊。若有衆生。聞是觀世音菩薩品自在之業。普門示現神通力者。當知是人功德不少。佛說是普門品時。衆中八萬四千衆生。皆發無等等阿耨多羅三藐三菩提心。

南無法華會上佛菩薩 三稱 三拜

南無觀世音菩薩 三稱 三拜 並念千聲或數百聲

破焚，舒住下風，一心念觀世音。俄將及，忽風迴火滅，合邑驚異。有惡少誦其靈威，俟夜風息，束薪縱火投屋，四投皆滅。始嗟神力。舒曰：我誦觀世音不懈，有難免。免。辨正論。

李懷瑾：江蘇睢寧北鄉車家店人。素業農，習科舉未能成名。清末，學堂興，改研習，忽被惡風所吹，雙瞳反背。經歷年許，刀圭罔效。李自分轉廢終身矣。一日，憶某書載無垢清淨光，慧日破諸闇，能伏災風，青巖照世間，浩日疾有靈驗。我何不誦之。乃設香案，以豆記數。每日日出，日中入二時，各跪誦三百遍。誦至九十日，見孟子二字如車輪大。益誠懇精進。未及半載，兩目平復如故。民國六年冬月，李聞余自滬旋里，專誠來謁，具道所以。予曰：汝所謂乃妙法蓮華經觀世音菩薩普門品偈語也。經云：聞妙法蓮華經一句，一偈，悉當成佛。汝之功德，已不可思議。倘能進而受持，全品或全經，綿綿不已，現生即當超凡入聖矣。李聞言大喜，予乃檢普門品一卷授之，李信受而去。現在津浦路明光鎮開藥肆，以為生誦經不輟。丁卯五月郭寅泉記。觀音靈威錄。自七

民國以後，大業經會陳隋仙居士言。自七八年多，家住滬西海格路。某日，有日兵車經過，鄭童以泥團拋入，並呼打倒日本兒。日兵即停車捕人，拋泥者已逃散。小兒鴻智年方十歲，適開門出，日兵不問情

由，即捉之上車。幸鄰人代為辯白，該兵乃由車上將其推下。其他日兵又以皮鞋脚在脅部猛踢十餘下，乃去。小兒則已暈絕，不知人事矣。追余晚間回家，鄰人皆勸送醫院，余方撫問時，小兒已醒。問痛處，云不痛。問踢時痛嗎，則云不知。余見其神情尚好，乃未動驚。次日，乃欲送醫院診察，而小兒已行動如常矣。據當時目覩者，斷無不受傷之理。此事除認為善護保護外，實無法可以說明也云。（保安法稿本）

山西聞喜縣，一弟子葉滋初，騎驢行於大嶺間，一邊高峯，二邊深澗。雪凍成冰，驟滑而墜，遂跌下澗。半崖有一株大樹，恰落到樹之中間，得以無虞。否則粉身碎骨矣。此樹何由而有，乃觀音所示現也。（印光法師上海護國息災法會法語）

民國十七年，寧波蔡仁初，於滬開五金玻璃店。人極醇厚，與翫雲臺善。雲臺台常念觀音，意防佛票，仁初信之。一日，將去，自己汽車在門外。鄉匪以手槍趕開車者，去，匪拿其車。仁初一躍而上，隨即開缸，已而輪胎爆裂，車，蠕蠕。再前行，油缸炸破，而蔡以火焚之。匪下車恨甚，向之開三六月，與其夫人，同至普陀皈依。同上印光法師嘉言。每日除了已職分外，專心念佛名號。朝暮佛前，竭誠盡敬。懇到懺悔無始宿業。如是久之，當有不思議利

益，得於不知不覺之中。法華經云：若有眾生，多於欲欲，常念恭敬觀世音菩薩，便得離欲。願志，愚疑亦然。是知能至誠念彌陀，觀音聖號者，貪瞋癡三毒自可消除也。又現今乃患難世道，須於念佛外加念觀音聖號，冥冥中自有不可思議之轉迴。庶不致有現前，無法醫脫耳。若遇刀兵水火，飢饉蟲蝗，瘟疫早癘，賊匪怨家，惡獸毒蛇，惡鬼妖魅，怨業病，小人陷害等患難者，能發改過遷善，自利利人之害，至誠懇切，念觀世音，念無間，決定得蒙慈護，不至有所危險。倘仍存不善之心，雖能稱念，不過路種未來善根，不得現時感應。以佛菩薩是成就人之善念，絕不成就人之惡念。若不發心改過遷善，妄欲以念佛菩薩名號，冀己之惡事成就者，決無好應。切勿發此顛倒之心也。念佛最要緊，是敦儉盡分，閑邪正誠。諸惡莫作，眾善奉行。存好心，說好話，行好事，力能為者，認真為之。不能為者，亦當發此善心，或勤有力者為之。或見人為，不能為，見他人為，則生妬忌。便成好惡，小人心行。決定折福招子，不得好結果也。宜痛戒之。切不可做假招子，沾名釣譽也。此種心行，實為天地鬼神所共惡。有則改之，無則加勉。

念念在世俗，則一切行皆與佛相應。

忉利天宮神通品第一

如是我聞。一時佛在忉利天。爲母說法。爾時十方無量世界。不可說不可說一切諸佛。及大菩薩摩訶薩。皆來集會。讚歎釋迦牟尼佛。能於五濁惡世。現不可思議大智慧神通之力。調伏剛強衆生。知苦樂法。各遣侍者。問訊世尊。是時如來含笑。放百千萬億大光明雲。所謂大圓滿光明雲。大慈悲光明雲。大智慧光明雲。大般若光明雲。大三昧光明雲。大吉祥光明雲。大福德光明雲。大功德光明雲。大歸依光明雲。大讚歎光明雲。放如是等不可說光明雲已。又出種種微妙之音。所謂檀波羅蜜音。尸波羅蜜音。摩提波羅蜜音。毗離耶波羅蜜音。禪波羅蜜音。般若波羅蜜音。慈悲音。喜捨音。解脫音。無漏音。智慧音。大智慧音。師子吼音。大師子吼音。雲雷音。大雲雷音。出如是等不可說不可說音已。娑婆世界。及他方國土。有無量億天龍鬼神。亦集到忉利天宮。所謂四天王天。忉利天。須臾摩天。兜率陀天。化樂天。他化自在天。梵衆天。梵輔天。大梵天。少光天。無量光天。光音天。少淨天。無量淨天。徧淨天。福生天。福愛天。廣果天。無想天。無煩天。無熱天。善見天。善現天。色究竟天。摩醯首羅天。乃至非想非非想處天。一切天衆。龍衆。鬼神等衆。悉來集會。復有他方國土。及娑婆世界。海神。江神。河神。樹神。山神。地神。川澤神。苗稼神。晝神。夜神。天神。飲食神。草木神。如是等神。皆來集會。復有他方國土。及娑婆世界。諸大鬼王。所謂惡目鬼王。噉血鬼王。噉精氣鬼。

王。噉哈明鬼王。行病鬼王。攝毒鬼王。慈心鬼王。福利鬼王。大愛敬鬼王。如是等鬼王。皆來集會。爾時釋迦牟尼佛。告文殊師利法王子菩薩摩訶薩。汝觀是一切諸佛菩薩。及天龍鬼神。此世界他世界。此國土他國土。如是今來集會。到切利天者。汝知數不。文殊師利白佛言。世尊。若以我神力。千劫調度。不能得知。佛告文殊師利。吾以佛眼觀。故猶不盡數。此皆是地藏菩薩。久遠劫來。已度當度。未度已成。成就未成就。文殊師利白佛言。世尊。我已過去久修善根。證無礙智。聞佛所言。即當信受。小果聲聞。天龍八部。及未來世諸衆生等。雖聞如來誠實之語。必懷疑惑。設使頂受。未免興謗。唯願世尊。廣說地藏菩薩摩訶薩。因地作何行。立何願。而能成就。不思議事。佛告文殊師利。譬如三千大千世界。所有草木叢林。稻麻竹葦。山石微塵。一物一數。作一恆河。一恆河沙。一沙一界。一界之內。一塵一劫。一劫之內。所積塵數。盡充爲劫。地藏菩薩證十地果位。已來。千倍多於上喻。何況地藏菩薩。在聲聞辟支佛地。文殊師利。此菩薩威神誓願。不可思議。若未來世。有善男子善女人。聞是菩薩名字。或讚歎。或瞻禮。或稱名。或供養。乃至彩畫刻鏤塑漆形像。是人當得百返生於三十三天。永不墮惡道。文殊師利。是地藏菩薩摩訶薩。於過去久遠。不可說不可說劫前。身爲大長者子。時世有佛。號曰師子奮迅具足萬行如來。時長者子。見佛相好。千福莊嚴。因問彼佛。作何行願。而得此相。時師子奮迅具足萬行如來。告長者子。欲證此身。當須久遠度脫一切受苦衆生。文殊師利。時長者子。因發願言。我今盡未來際。不可計劫。爲是罪苦六道衆生。廣設方便。盡令解脫。而我自身。方成佛道。以是於彼佛前。立斯大願。于今百千萬億那由他。不可說劫。尙爲菩薩。又於過去不

可思議阿僧祇劫。時世有佛。號曰覺華定自在王如來。彼佛壽命。四百千萬億阿僧祇劫。像法之中。有一婆羅門女。宿福深厚。衆所欽敬。行住坐臥。諸天衛護。其母信邪。常輕三寶。是時聖女。廣設方便。勸誘其母。令生正見。而此女母。未全生信。不久命終。魂神墮在無間地獄。時婆羅門女。知母在世。不信因果。計當隨業。必生惡趣。遂賣家宅。廣求香華。及諸供具。於先佛塔寺。大興供養。見覺華定自在王如來。其形像在一寺中。塑畫威容。端嚴畢備。時婆羅門女。瞻禮尊容。倍生敬仰。私自念言。佛名大覺。具一切智。若在世時。我母死後。儻來問佛。必知處所。時婆羅門女。垂泣良久。瞻戀如來。忽聞空中聲曰。泣著聖女。勿至悲哀。我今示汝母之去處。婆羅門女。合掌向空。而白空曰。是何神德。寬我憂慮。我自失母已來。晝夜憶戀。無處可問。知母生界。時空中有聲。再報女曰。我是汝所瞻禮者。過去覺華定自在王如來。見汝憶母。倍於常情。衆生之分。故來告示。婆羅門女。聞此聲已。舉身自撲。支節皆損。左右扶侍。良久方蘇。而白空曰。願佛慈愍。速說我母生界。我今身心將死不久。時覺華定自在王如來。告聖女曰。汝供養畢。但早返舍。端坐思惟。吾之名號。卽當知母所生去處。時婆羅門女。尋禮佛已。卽歸其舍。以憶母故。端坐念覺華定自在王如來。經一日一夜。忽見自身。到一海邊。其水涌沸。多諸惡獸。盡復鐵身。飛走海上。東西馳逐。見諸男子。女人。百千萬數。出沒海中。被諸惡獸。爭取食噉。又見夜叉。其形各異。或多手多眼。多足多頭。口牙外出。利刃如劍。驅諸罪人。使近惡獸。復自搏攫。頭足相就。其形萬類。不敢久視。時婆羅門女。以念佛力故。自然無懼。有一鬼王。名曰無毒。稽首來迎。白聖女曰。善哉菩薩。何緣來此。時婆羅門女。問鬼王曰。此是何處。無毒答曰。此是大鐵

圍山西面第一重海。聖女問曰。我聞鐵圍之內。地獄在中。是事實不。無毒答曰。實有地獄。聖女問曰。我今云何得到獄所。無毒答曰。若非威神。卽須業力。非此二事。終不能到。聖女又問。此水何緣而乃涌沸。多諸罪人。及以惡獸。無毒答曰。此是閻浮提造惡衆生。新死之者。經四十九日後。無人繼嗣。爲作功德。救拔苦難。生時又無善因。當據本業所感地獄。自然先渡此海。海東十萬由旬。又有一海。其苦倍此。彼海之東。又有一海。其苦復倍。三業惡因之所招感。共號業海。其處是也。聖女又問。鬼王無毒曰。地獄何在。無毒答曰。三海之內。是大地獄。其數百千。各各差別。所謂大者。具有十八。次有五百。苦毒無量。次有千百。亦無量苦。聖女又問。大鬼王曰。我母死來未久。不知魂神當至何趣。鬼王問聖女曰。菩薩之母。在生習何行業。聖女答曰。我母邪見。譏毀三寶。設或暫信。旋又不敬。死雖日淺。未知生處。無毒問曰。菩薩之母。姓氏何等。聖女答曰。我父我母。俱婆羅門種。父號尸羅善現。母號悅帝利。無毒合掌。啓菩薩曰。願聖者卻返本處。無至憂憶悲戀。悅帝利罪女。生天以來。經今三日。云承孝順之子。爲母設供修福。布施覺華定自在王如來塔寺。非唯菩薩之母。得脫地獄。應是無間罪人。此日悉得受樂。俱同生訖。鬼王言畢。合掌而退。婆羅門女。尋如夢歸。悟此事已。便於覺華定自在王如來塔像之前。立弘誓願。願我盡未來劫。應有罪苦衆生。廣設方便。使令解脫。佛告文殊師利。時鬼王無毒者。當今財首菩薩是。婆羅門女者。卽地藏菩薩是。

分身集會品第二

爾時百千萬億不可思不可議不可量不可說無量阿僧祇世界所有地獄處分身地藏菩薩。俱來集在

忉利天宮。以如來神力故。各以方面。與諸得解脫從業道出者。亦各有千萬億那由他數。共持香華。來供養佛。彼諸同來等輩。皆因地藏菩薩教化。永不退轉於阿耨多羅三藐三菩提。是諸衆等。久遠劫來。流浪生死。六道受苦。暫無休息。以地藏菩薩。廣大慈悲。深誓願故。各獲果證。既至忉利心。懷踊躍。瞻仰如來。目不暫捨。爾時世尊。舒金色臂。摩百千萬億不可思議不可量不可說無量阿僧祇世界諸分身地藏菩薩摩訶薩頂。而作是言。吾於五濁惡世。教化如是剛強衆生。令心調伏。捨邪歸正。十有一二。尙惡習在。吾亦分身千百億。廣設方便。或有利根。聞卽信受。或有善果。勤勸成就。或有暗鈍。久化方歸。或有業重。不生敬仰。如是等輩衆生。各各差別。分身度脫。或現男子身。或現女人身。或現天龍身。或現神鬼身。或現山林川原。河池泉井。利及於人。悉皆度脫。或現天帝身。或現梵王身。或現轉輪王身。或現居士身。或現國王身。或現宰輔身。或現官屬身。或現比丘。比丘尼。優婆塞。優婆夷身。乃至聲聞。羅漢。辟支佛。菩薩等身。而以化度。非但佛身。獨現其前。汝觀吾累劫勤苦。度脫如是等難化剛強罪苦衆生。其有未調伏者。隨業報應。若墮惡趣。受大苦時。汝當憶念。吾在忉利天宮。懇勸付囑。令娑婆世界至彌勒出世已來衆生。悉使解脫。永離諸苦。遇佛授記。爾時諸世界分身地藏菩薩。共復一形。涕淚哀戀。白其佛言。我從久遠劫來。蒙佛接引。使獲不可思議神力。具大智慧。我所分身。徧滿百千萬億恆河沙世界。每一世界。化百千萬億身。每一身。度百千萬億人。令歸敬三寶。永離生死。至涅槃樂。但於佛法中。所爲善事。一毛一掃。一沙一塵。或毫髮許。我漸度脫。使獲大利。唯願世尊。不以後世惡業衆生爲慮。如是三白佛言。唯願世尊。不以後世惡業衆

生爲慮。爾時佛讚地藏菩薩言。善哉善哉。吾助汝喜。汝能成就久遠劫來發弘誓願。廣度將畢。卽證菩提。觀衆生業緣品第三

爾時佛母摩耶夫人。恭敬合掌。問地藏菩薩言。聖者。閻浮衆生。造業差別。所受報應。其事云何。地藏答言。千萬世界。乃及國土。或有地獄。或無地獄。或有女人。或無女人。或有佛法。或無佛法。乃至聲聞。辟支佛。亦復如是。非但地獄罪報一等。摩耶夫人。重白菩薩。且願聞於閻浮罪報。所感惡趣。地藏答言。聖母。唯願聽受。我粗說之。佛母白言。願聖者說。爾時地藏菩薩白聖母言。南閻浮提。罪報名號如是。若有衆生。不孝父母。或至殺害。當墮無間地獄。千萬億劫。求出無期。若有衆生。出佛身血。毀謗三寶。不敬尊經。亦當墮於無間地獄。千萬億劫。求出無期。若有衆生。侵損常住。點污僧尼。或伽藍內。恣行淫欲。或殺或害。如是等輩。當墮無間地獄。千萬億劫。求出無期。若有衆生。僞作沙門。心非沙門。破用常住。欺誑白衣。違背戒律。種種造惡。如是等輩。當墮無間地獄。千萬億劫。求出無期。若有衆生。偷竊常住。財物穀米。飲食衣服。乃至一物。不與取者。當墮無間地獄。千萬億劫。求出無期。地藏白言。聖母。若有衆生。作如是罪。當墮五無間地獄。求暫停苦。一念不得。摩耶夫人。重白地藏菩薩言。云何名爲無間地獄。地藏白言。聖母。諸有地獄。在大鐵圍山之內。其大地獄。有一十八所。次有五百名號各別。次有千百名字亦別。無間獄者。其獄城周匝八萬餘里。其城純鐵。高一萬里。城上火聚。少有空缺。其獄城中。諸獄相連。名號各別。獨有一獄。名曰無間。其獄周匝萬八千里。獄牆高一千里。悉是鐵爲。上火徹下。下火徹上。鐵蛇鐵狗。吐火馳逐。獄牆之上。東西而走。獄中

有牀。徧滿萬里。一人受罪。自見其身。徧臥滿牀。千萬人受罪。亦各自見身滿牀上。衆業所感。獲報如是。又諸罪人。備受衆苦。千百夜。又以惡鬼。口牙如劍。眼如電光。手復銅爪。拖拽罪人。復有夜叉。執大鐵戟。中罪人身。或中口鼻。或中腹背。拋空翻接。或置牀上。復有鐵鷹。啗罪人目。復有鐵蛇。繳罪人頸。百肢節內。悉下長釘。拔舌耕犁。抽腸剗斬。洋銅灌口。熱鐵纏身。萬死千生。業感如是。動經億劫。求出無期。此界壞時。寄生他界。他界次壞。轉寄他方。他方壞時。展轉相寄。此界成後。還復而來。無間罪報。其事如是。又五事業感。故稱無間。何等爲五。一者。日夜受罪。以至劫數。無時間絕。故稱無間。二者。一人亦滿。多人亦滿。故稱無間。三者。罪器叉棒。鷹蛇狼犬。確磨鋸鑿。剗斫鑊湯。鐵網鐵繩。鐵驢鐵馬。生革絡首。熱鐵澆身。飢吞鐵丸。渴飲鐵汁。從年竟劫。數那由他。苦楚相連。更無間斷。故稱無間。四者。不問男子女人。羌胡夷狄。老幼貴賤。或龍或神。或天或鬼。罪行業感。悉同受之。故稱無間。五者。若墮此獄。從初入時。至百千劫。一日一夜。萬死萬生。求一念間。暫住不得。除非業盡。方得受生。以此連綿。故稱無間。地藏菩薩。白聖母言。無間地獄。粗說如是。若廣說地獄罪器等名。及諸苦事。一劫之中。求說不盡。摩耶夫人聞已。愁憂合掌。頂禮而退。

閻浮衆生業感品第四

爾時地藏菩薩摩訶薩。白佛言。世尊。我承佛如來威神力故。徧百千萬億世界。分是身形。救拔一切業報衆生。若非如來大慈力故。卽不能作如是變化。我今又蒙佛付囑。至阿逸多成佛已來。六道衆生。遣令度脫。唯然世尊。願不有慮。爾時佛告地藏菩薩。一切衆生。未解脫者。性識無定。惡習結業。善習結果。爲善爲

惡。遂境而生。輪轉五道。暫無休息。動經塵劫。迷惑障難。如魚遊網。將是長流。脫入暫出。又復遭網。以是等輩。吾當憂念。汝既畢。是往願。累劫重誓。廣度罪輩。吾復何慮。說是語時。會中有一菩薩摩訶薩。名定自在。王。白佛言。世尊。地藏菩薩。累劫已來。各發何願。今蒙世尊。慰勸讚歎。唯願世尊。略而說之。爾時世尊。告定自在。王菩薩。諦聽諦聽。善思念之。吾當爲汝。分別解說。乃往過去。無量阿僧祇那由他。不可說劫。爾時有佛。號一切智成就如來。應供。正徧知。明行足。善逝。世間解。無上士。調御丈夫。天人師。佛世尊。其佛壽命六萬劫。未出家時。爲小國王。與一鄰國王爲友。同行十善。饒益衆生。其鄰國內。所有人民。多造衆惡。二王議計。廣設方便。一王發願。早成佛道。當度是輩。令使無餘。一王發願。若不先度罪苦。令是安樂。得至菩提。我終未願成佛。佛告定自在王菩薩。一王發願。早成佛者。卽一切智成就如來。是一王發願。永度罪苦衆生。未願成佛者。卽地藏菩薩。是復於過去。無量阿僧祇劫。有佛出世。名清淨蓮華目如來。其佛壽命四十劫。像法之中。有一羅漢。福度衆生。因次教化。遇一女人。字曰光目。設食供養。羅漢問之。欲願何等。光目答言。我以母亡之日。資福救拔。未知我母。生處何趣。羅漢愍之。爲人定觀。見光母女母。墮在惡趣。受極大苦。羅漢問光目言。汝母在生。作何行業。今在惡趣。受極大苦。光目答言。我母所習。唯好食噉魚鼈之屬。所食魚鼈。多食其子。或炒或煮。恣情食噉。計其命數。千萬復倍。尊者慈愍。如何哀救。羅漢愍之。爲作方便。勸光目言。汝可志誠。念清淨蓮華目如來。兼塑畫形像。存亡獲報。光目聞已。卽捨所愛。尋畫佛像。而供養之。復恭敬心。悲泣瞻禮。忽於夜後。夢見佛身。金色晃耀。如須彌山。放大光明。而告光目。汝母不久。當生汝家。纔覺

飢寒。卽當言說。其後家內婢生一子。未滿三日。而乃言說。稽首悲泣。告於光目。生死業緣。果報自受。吾是汝母。久處暗冥。自別汝來。累墮大地獄。蒙汝福力。方得受生。爲下賤人。又復短命。壽年十三。更落惡道。汝有何計。令吾脫免。光目聞說。知母無疑。哽咽悲啼。而白婢子。既是我母。合知本罪。作何行業。墮於惡道。婢子答言。以殺害毀罵二業受報。若非蒙福。救拔吾難。以是業故。未合解脫。光目問言。地獄罪報。其事云何。婢子答言。罪苦之事。不忍稱說。百千歲中。卒白難竟。光目聞已。啼淚號泣。而白空界。願我之母。永脫地獄。畢十三歲。更無重罪。及歷惡道。十方諸佛。慈悲哀愍我。聽我爲母所發廣大誓願。若得我母。永離三塗。及斯下賤。乃至女人之身。永劫不受者。願我自今日後。對清淨蓮華目。如來像前。卻後百千萬億劫中。應有世界。所有地獄。及三惡道。諸罪苦衆生。誓願救拔。令離地獄惡趣。畜生餓鬼等。如是罪報等人。盡成佛竟。我然後方成正覺。發誓願已。具聞清淨蓮華目。如來而告之曰。光目。汝大慈愍。善能爲母發如是大願。吾觀汝母。十三歲畢。捨此報已。生爲梵志。壽年百歲。過是報後。當生無憂國土。壽命不可計劫。後成佛果。廣度人天。數如恆河沙。佛告定自在王。爾時羅漢。福度光目者。卽無盡意菩薩是。光目母者。卽解脫菩薩是。光目女者。卽地藏菩薩是。過去久遠劫中。如是慈愍。發恆河沙願。廣度衆生。未來世中。若有男子女人。不行善者。行惡者。乃至不信因果者。邪淫妄語者。兩舌惡口者。毀謗大乘者。如是諸業衆生。必墮惡趣。若遇善知識。勸令一彈指間。歸依地藏菩薩。是諸衆生。卽得解脫三惡道報。若能志心歸敬。及瞻禮讚歎。香華衣服。種種珍寶。或復飲食。如是奉事者。未來百千萬億劫中。常在諸天。受勝妙樂。若天福盡。下生人間。猶百

千劫常爲帝王。能憶宿命因果本末。定自在王。如是地藏菩薩。有如此不可思議大威神力。廣利衆生。汝等諸菩薩當記是經。廣宣流布。定自在王白佛言。世尊。願不有慮。我等千萬億菩薩摩訶薩。必能承佛威神。廣演是經。於閻浮提。利益衆生。定自在王菩薩白世尊已。合掌恭敬。作禮而退。爾時四方天王。俱從座起。合掌恭敬。白佛言。世尊。地藏菩薩。於久遠劫來。發如是大願。云何至今。猶度未絕。更發廣大誓言。唯願世尊。爲我等說。佛告四天王。善哉善哉。吾今爲汝。及未來現在天人衆等。廣利益故。說地藏菩薩於娑婆世界。閻浮提內。生死道中。慈悲救拔。度脫一切罪苦衆生。方便之事。四天王言。唯然。世尊。願樂欲聞。佛告四天王。地藏菩薩。久遠劫來。迄至于今。度脫衆生。猶未畢願。慈悲此世罪苦衆生。復觀未來無量劫中。因蔓不斷。以是之故。又發重願。如是菩薩。於娑婆世界。閻浮提中。百千萬億方便。而爲教化。四天王。地藏菩薩。若遇殺生者。說宿殃短命報。若遇竊盜者。說貧窮苦楚報。若遇邪淫者。說雀鴿鴛鴦報。若遇惡口者。說眷屬鬪諍報。若遇毀謗者。說無舌瘡口報。若遇瞋恚者。說醜陋癱殘報。若遇慳吝者。說所求遠願報。若遇飲食無度者。說飢渴咽病報。若遇畋獵恣情者。說驚狂喪命報。若遇悖逆父母者。說天地災殺報。若遇燒山林木者。說狂迷取死報。若遇前後父母惡毒者。說返生鞭撻現受報。若遇網捕生雛者。說骨肉分離報。若遇毀謗三寶者。說盲聾瘡癩報。若遇輕法慢教者。說永處惡道報。若遇破用常住者。說億劫輪迴地獄報。若遇汚梵誣僧者。說永在畜生報。若遇湯火斬斫傷生者。說輪迴遞償報。若遇破戒犯齋者。說禽獸飢餓報。若遇非理毀用者。說所求闕絕報。若遇吾我貢高者。說卑使下賤報。若遇兩舌鬪亂者。說無舌百舌

報。若遇邪見者。說邊地受生報。如是等閻浮提衆生。身口意業。惡習結果。百千報應。今粗略說。如是等閻浮提衆生。業感差別。地藏菩薩百千方便而教化之。是諸衆生。先受如是等報。後墮地獄。動經劫數。無有出期。是故汝等。護人護國。無令是諸衆業。迷惑衆生。四天王聞已。涕淚悲歎。合掌而退。

地藏菩薩本願經卷上

地藏菩薩本願經卷中

唐于闐國三藏沙門實叉難陀譯

地獄名號品第五

爾時普賢菩薩摩訶薩。白地藏菩薩言。仁者。願爲天龍四衆。及未來現在一切衆生。說娑婆世界。及閻浮提。罪苦衆生。所受報處。地獄名號。及惡報等事。使未來世末法衆生。知是果報。地藏答言。仁者。我今承佛威神。及大士之力。略說地獄名號。及罪報惡報之事。仁者。閻浮提東方有山。號曰鐵圍。其山黑邃。無日月光。有大地獄。號極無間。又有地獄。名大阿鼻。復有地獄。名曰四角。復有地獄。名曰飛刀。復有地獄。名曰火箭。復有地獄。名曰夾山。復有地獄。名曰通槍。復有地獄。名曰鐵車。復有地獄。名曰鐵牀。復有地獄。名曰鐵牛。復有地獄。名曰鐵衣。復有地獄。名曰千刃。復有地獄。名曰鐵驢。復有地獄。名曰烱銅。復有地獄。名曰抱柱。復有地獄。名曰流火。復有地獄。名曰耕舌。復有地獄。名曰剗首。復有地獄。名曰燒脚。復有地獄。名曰啗

眼。復有地獄。名曰鐵丸。復有地獄。名曰誣論。復有地獄。名曰鐵鉢。復有地獄。名曰多頓。地藏白言。仁者。鐵圍之內。有如是等地獄。其數無限。更有叫喚地獄。拔舌地獄。糞尿地獄。銅鎖地獄。火象地獄。火狗地獄。火馬地獄。火牛地獄。火山地獄。火石地獄。火牀地獄。火梁地獄。火鷹地獄。鋸牙地獄。剝皮地獄。飲血地獄。燒手地獄。燒脚地獄。倒刺地獄。火屋地獄。鐵屋地獄。火狼地獄。如是等地獄。其中各各復有諸小地獄。或一或二。或三。或四。乃至百千。其中名號。各各不同。地藏菩薩告普賢菩薩言。仁者。此者皆是南閻浮提。行惡衆生。業感如是。業力甚大。能敵須彌。能深巨海。能障聖道。是故衆生。莫輕小惡。以爲無罪。死後有報。纖毫受之。父子至親。歧路各別。縱然相逢。無肯代受。我今承佛威力。略說地獄罪報之事。唯願仁者。暫聽是言。普賢答言。吾已久知三惡道報。望仁者說。令後世末法。一切惡行衆生。聞仁者說。使令歸佛。地藏白言。仁者。地獄罪報。其事如是。或有地獄。取罪人舌。使牛耕之。或有地獄。取罪人心。夜叉食之。或有地獄。鑊湯盛沸。煮罪人身。或有地獄。赤燒銅柱。使罪人抱。或有地獄。使諸火燒。趁及罪人。或有地獄。一向寒冰。或有地獄。無限糞尿。或有地獄。純飛鐵錐。或有地獄。多攢火槍。或有地獄。唯撞胸背。或有地獄。但燒手足。或有地獄。盤繳鐵蛇。或有地獄。驅逐鐵狗。或有地獄。盡駕鐵驢。仁者。如是等報。各各獄中。有百千種業道之器。無非是銅是鐵。是石是火。此四種物。衆業行感。若廣說地獄罪報等事。一一獄中。更有百千種苦楚。何況多獄。我今承佛威神。及仁者問。略說如是。若廣解說。窮劫不盡。

如來讚歎品第六

爾時世尊舉身放大光明。徧照百千萬億恆河沙等諸佛世界。出大音聲。普告諸佛世界一切諸菩薩摩訶薩。及天龍鬼神人非人等。聽吾今日稱揚讚歎地藏菩薩摩訶薩。於十方世界。現大不可思議威神慈悲之力。救護一切罪苦之事。吾滅度後。汝等諸菩薩大士。及天龍鬼神等。廣作方便。衛護是經。令一切衆生。證涅槃樂。說是語已。會中有一菩薩。名曰普廣。合掌恭敬而白佛言。今見世尊讚歎地藏菩薩。有如是不可思議大威神德。唯願世尊。爲未來世末法衆生。宣說地藏菩薩利益人天因果等事。使諸天龍八部。及未來世衆生。頂受佛語。爾時世尊。告普廣菩薩。及四衆等。諦聽諦聽。吾當爲汝略說地藏菩薩利益人天福德之事。普廣白言。唯然世尊。願樂欲聞。佛告普廣菩薩。未來世中。若有善男子善女人。聞是地藏菩薩摩訶薩名者。或合掌者。讚歎者。作禮者。戀慕者。是人超越三十劫罪。普廣。若有善男子善女人。或彩畫形像。或土石膠漆。金銀銅鐵。作此菩薩。一瞻一禮者。是人百返生於三十三天。永不墮於惡道。假如天福盡故。下生人間。猶爲國王。不失大利。若有女人。厭女人身。盡心供養地藏菩薩畫像。及土石膠漆銅鐵等像。如是日日不退。常以華香飲食。衣服繒綵。幢幡錢寶物等供養。是善女人。盡此一報女身。百千萬劫。更不生有女人世界。何況復受。除非慈願力故。要受女身。度脫衆生。承斯供養地藏力故。及功德力。百千萬劫。不受女身。復次普廣。若有女人。厭是醜陋多疾病者。但於地藏像前。志心瞻禮。食頃之間。是人千萬劫中所受生身。相貌圓滿。是醜陋女人。如不厭女身。卽百千萬億生中。常爲王女。乃至王妃。宰輔大姓大長者女。端正受生。諸相圓滿。由志心故。瞻禮地藏菩薩。獲福如是。復次普廣。若有善男子善女人。能對菩薩

像前。作諸伎樂。及歌詠讚歎。香華供養。乃至勸於一人多人。如是等輩。現在世中。及未來世。常得百千鬼神。日夜衛護。不令惡事。輒聞其耳。何況親受諸橫。復次普廣。未來世中。若有惡人。及惡神惡鬼。見有善男子善女人。歸敬供養。讚歎瞻禮。地藏菩薩形像。或妄生譏毀。謗無功德。及利益事。或露齒笑。或背而非。或勸人共非。或一人非。或多人非。乃至一念生譏毀者。如是之人。賢劫千佛滅度。譏毀之報。尙在阿鼻地獄。受極重罪。過是劫已。方受餓鬼。又經千劫。復受畜生。又經千劫。方得人身。縱受人身。貧窮下賤。諸根不具。多被惡業。來結其心。不久之間。復墮惡道。是故普廣。譏毀他人供養。尙獲此報。何況別生惡見毀滅。復次普廣。若未來世。有男子女人。久處牀枕。求生求死。了不可得。或夜夢惡鬼。乃及家親。或遊險道。或多魘寐。共鬼神遊。日月歲深。轉復尪瘵。眠中叫苦。慘懷不樂者。此皆是業道論對。未定輕重。或難捨壽。或不得愈。男女俗眼。不辨是事。但當對諸佛菩薩像前。高聲轉讀此經一徧。或取病人可愛之物。或衣服寶貝。莊園舍宅。對病人前。高聲唱言。我某甲等。爲是病人。對經像前。捨諸等物。或供養經像。或造佛菩薩形像。或造塔寺。或然油燈。或施常住。如是三白病人。遣令聞知。假令諸識分散。至氣盡者。乃至一日二日三日四日。至七日已來。但高聲白。高聲讀經。是人命終之後。宿殃重罪。至于五無間罪。永得解脫。所受生處。常知宿命。何況善男子善女人。自書此經。或教人書。或自塑畫菩薩形像。乃至教人塑畫。所受果報。必獲大利。是故普廣。若見有人讀誦是經。乃至一念讚歎是經。或恭敬者。汝須百千方便。勸是等人。勤心莫退。能得未來現在千萬億不可思議功德。復次普廣。若未來世諸衆生等。或夢或寐。見諸鬼神。乃及諸形。或悲或啼。

或愁或歎。或恐或怖。此皆是一生十生百生千生。過去父母男女弟妹。夫妻眷屬。在於惡趣。未得出離。無處希望。福力救拔。當告宿世骨肉。使作方便。願離惡道。普廣。汝以神力。遣是眷屬。令對諸佛菩薩像前。志心自讀此經。或請人讀。其數三徧。或七徧。如是惡道眷屬。經聲畢。是徧數。當得解脫。乃至夢寐之中。永不復見。復次普廣。若未來世。有諸下賤等人。或奴或婢。乃至諸不自由之人。覺知宿業。要懺悔者。志心瞻禮地藏菩薩形像。乃至一七日中。念菩薩名。可滿萬徧。如是等人。盡此報後。千萬生中。常生尊貴。更不經三惡道苦。復次普廣。若未來世中。閻浮提內。刹利婆羅門長者居士一切人等。及異姓種族。有新產者。或男或女。七日之中。早與讀誦。此不思議經典。更爲念菩薩名。可滿萬徧。是新生子。或男或女。宿有殃報。便得解脫。安樂易養。壽命增長。若是承福生者。轉增安樂。及與壽命。復次普廣。若未來世衆生。於月一日。八日。十四日。十五日。十八日。二十三日。二十四日。二十八日。二十九日。乃至三十日。是諸日等。諸罪結集。定其輕重。南閻浮提衆生。舉止動念。無不是業。無不是罪。何況恣情殺害竊盜邪淫妄語。百千罪狀。能於是十齋日。對佛菩薩諸賢聖像前。讀是經一徧。東西南北。百由旬內。無諸災難。當此居家。若長若幼。現在未來。百千歲中。永離惡趣。能於十齋日。每轉一徧。現世令此居家。無諸橫病。衣食豐溢。定故普廣。當知地藏菩薩。有如是等。不可說。百千萬億。大威神力。利益之事。閻浮衆生。於此大士。有大因緣。是諸衆生。聞菩薩名。見菩薩像。乃至聞是經三字五字。或一偈一句者。現在殊妙安樂。未來之世。百千萬生。常得端正。生尊貴家。爾時普廣菩薩。聞佛如來。稱揚讚歎地藏菩薩已。胡跪合掌。復白佛言。世尊。我久知是大士。有如此不可思議。

神力及大誓願力。爲未來衆生。遣知利益。故問如來。唯然頂受。世尊。當何名此經。使我云何流布。佛告普廣。此經有三名。一名地藏本願。亦名地藏本行。亦名地藏本誓力經。緣此菩薩。久遠劫來。發大重願。利益衆生。是故汝等。依願流布。普廣聞已。合掌恭敬。作禮而退。

利益存亡品第七

爾時地藏菩薩摩訶薩。白佛言。世尊。我觀是閻浮衆生。舉心動念。無非是罪。脫獲善利。多退初心。若遇惡緣。念念增益。是等輩人。如履泥塗。負於重石。漸困漸重。足步深遠。若得遇知識。替與減負。或全與負。是知識有大力故。復相扶助。勸令牢脚。若達平地。須省惡路。無再經歷。世尊。習惡衆生。從纖毫間。便至無量。是諸衆生。有如此習。臨命終時。父母眷屬。宜爲設福。以資前路。或懸旛蓋。及然油燈。或轉讀尊經。或供養佛像。及諸聖像。乃至念佛菩薩。及辟支佛名字。一名一號。歷臨終人耳根。或聞在本識。是諸衆生。所造惡業。計其感果。必墮惡趣。緣是眷屬。爲臨終人。修此聖因。如是衆罪。悉皆消滅。若能更爲身死之後。七七日內。廣造衆善。能是諸衆生。永離惡趣。得生人天。受勝妙樂。現在眷屬。利益無量。是故我今對佛世尊。及天龍八部人非人等。勸於閻浮提衆生。臨終之日。慎勿殺害。及造惡緣。拜祭鬼神。求諸魘魅。何以故。爾所殺害。乃至拜祭。無纖毫之力。利益亡人。但結罪緣。轉增深重。假使來世。或現在生。得獲聖分。生人天中。緣是臨終。被諸眷屬。造是惡因。亦令是命終人。殃累對辯。晚生善處。何況臨命終人。在生未曾有少善根。各據本業。自受惡趣。何忍眷屬。更爲增業。譬如有人。從遠地來。絕糧三日。所負擔物。強過百斤。忽遇鄰人。更附

少物。以是之故。轉復困重。世尊。我觀閻浮衆生。但能於諸佛教中。乃至善事。一毛一蒂。一沙一塵。如是利益。悉皆自得。說是語時。會中有一長者。名曰大辯。是長者久證無生。化度十方。現長者身。合掌恭敬。問地藏菩薩言。大士。是南閻浮提衆生。命終之後。小大眷屬。爲修功德。乃至設齋。造衆善因。是命終人。得大利益。及解脫不。地藏答言。長者。我今爲未來現在一切衆生。承佛威力。略說是事。長者。未來現在諸衆生等。臨命終日。得聞一佛名。一菩薩名。一辟支佛名。不問有罪無罪。悉得解脫。若有男子女人。在生不修善因。多造衆罪。命終之後。眷屬小大。爲造福利。一切聖事。七分之中。而乃獲一。六分功德。生者自利。以是之故。未來現在善男女等。聞健自修。分分已獲。無常大鬼。不期而到。冥冥遊神。未知罪福。七七日內。如癡如聾。或在諸司。辯論業果。審定之後。據業受生。未測之間。千萬愁苦。何況墮於諸惡趣等。是命終人。未得受生。在七七日內。念念之間。望諸骨肉眷屬。與造福利救拔。過是日後。隨業受報。若是罪人。動經千百歲中。無解脫日。若是五無間罪。墮大地獄。千劫萬劫。永受衆苦。復次長者。如是罪業衆生。命終之後。眷屬骨肉。爲修營齋。資助業道。未齋食竟。及營齋之次。米泔菜葉。不棄於地。乃至諸食。未獻佛僧。勿得先食。如有違食。及不精勤。是命終人。了不得力。如精勤護淨。奉獻佛僧。是命終人。七分獲一。是故長者。閻浮衆生。若能爲其父母。乃至眷屬。命終之後。設齋供養。志心勤懇。如是之人。存亡獲利。說是語時。忉利天宮。有千萬億那由他閻浮鬼神。悉發無量菩提之心。大辯長者。作禮而退。

閻羅王衆讚歎品第八

爾時鐵圍山內有無量鬼王。與閻羅天子俱詣忉利。來到佛所。所謂惡毒鬼王。多惡鬼王。大諍鬼王。白虎
鬼王。血虎鬼王。赤虎鬼王。散殃鬼王。飛身鬼王。電光鬼王。狼牙鬼王。千眼鬼王。噉獸鬼王。負石鬼王。主耗
鬼王。主禍鬼王。主食鬼王。主財鬼王。主畜鬼王。主禽鬼王。主獸鬼王。主魅鬼王。主產鬼王。主命鬼王。主疾
鬼王。主險鬼王。三目鬼王。四目鬼王。五目鬼王。祁利失王。大祁利失王。祁利叉王。大祁利叉王。阿那吒王。
大阿那吒王。如是等大鬼王。各各與百千諸小鬼王。盡居閻浮提。各有所執。各有所主。是諸鬼王。與閻羅
天子。承佛威神。及地藏菩薩摩訶薩力。俱詣忉利。在一面立。爾時閻羅天子。胡跪合掌。白佛言。世尊。我等
今者。與諸鬼王。承佛威神。及地藏菩薩摩訶薩力。方得詣此忉利大會。亦是我等獲善利故。我今有小疑
事。敢問世尊。唯願世尊。慈悲宣說。佛告閻羅天子。恣汝所問。吾爲汝說。是時閻羅天子。瞻禮世尊。及迴視
地藏菩薩。而白佛言。世尊。我觀地藏菩薩。在六道中。百千方便。而度罪苦衆生。不辭疲倦。是大菩薩。有如
是不可思議神通之事。然諸衆生。脫獲罪報。未久之間。又墮惡道。世尊。是地藏菩薩。既有如是不可思議
神力。云何衆生而不依止善道。永取解脫。唯願世尊。爲我解說。佛告閻羅天子。南閻浮提衆生。其性剛強。
難調難伏。是大菩薩。於百千劫。頭頭救拔。如是衆生。早令解脫。是罪報人。乃至墮大惡趣。菩薩以方便力。
拔出根本業緣。而遣悟宿世之事。自是閻浮衆生。結惡習重。旋出旋入。勞斯菩薩。久經劫數。而作度脫。譬
如有人。迷失本家。誤入險道。其險道中。多諸夜叉。及虎狼師子。蛇虵蝮蝎。如是迷人在險道中。須臾之間。
卽遭諸毒。有一知識。多解大術。善禁是毒。乃及夜叉諸惡毒等。忽逢迷人。欲進險道。而語之言。咄哉男子。

爲何事故而入此路。有何異術能制諸毒。是迷路者。忽聞是語。方知險道。即便退步。求出此路。是善知識。提攜接手。引出險道。免諸惡毒。至於好道。令得安樂。而語之言。咄哉迷人。自今已後。勿履是道。此路入者。卒難得出。復損性命。是迷路者。亦生感重。臨別之時。知識又言。若見親知。及諸路人。若男若女。言於此路。多諸毒惡。喪失性命。無令是衆。自取其死。是故地藏菩薩。具大慈悲。救拔罪苦衆生。生人天中。令受妙樂。是諸罪衆。知業道苦。脫得出離。永不再歷。如迷路者。誤入險道。遇善知識。引接令出。永不復入。逢見他人。復勸莫入。自言因是迷故。得解脫。竟更不復入。若再履踐。猶尙迷誤。不覺舊曾所落險道。或致失命。如墮惡趣。地藏菩薩方便力故。使令解脫。生人天中。旋又再入。若業結重。永處地獄。無解脫時。爾時惡毒鬼王。合掌恭敬。白佛言。世尊。我等諸鬼王。其數無量。在閻浮提。或利益人。或損害人。各各不同。然是業報。使我眷屬。遊行世界。多惡少善。過人家庭。或城邑聚落。莊園房舍。或有男子。女人。修毛髮善事。乃至懸一旛。一蓋。少香少華。供養佛像。及菩薩像。或轉讀尊經。燒香供養。一句一偈。我等鬼王。敬禮是人。如過去現在未來諸佛。勅諸小鬼。各有大力。及土地分。便令衛護。不令惡事橫事。惡病橫病。乃至不如意事。近於此舍等處。何況入門。佛讚鬼王。善哉善哉。汝等及與閻羅。能如是擁護善男女等。吾亦告梵王帝釋。令衛護汝。說是語時。會中有一鬼王。名曰主命。白佛言。世尊。我本業緣。主閻浮人命。生時死時。我皆主之。在我本願。甚欲利益。自是衆生。不會我意。致令生死。俱不得安。何以故。是閻浮提人。初生之時。不問男女。或欲生時。但作善事。增益舍宅。自令土地無量歡喜。擁護子母。得大安樂。利益眷屬。或已生下。慎勿殺害。取諸鮮味。供

給產母。及廣聚眷屬。飲酒食肉。歌樂絃管。能令子母。不得安樂。何以故。是產難時。有無數惡鬼。及魍魎精魅。欲食腥血。是我早令舍宅土地靈祇。荷護子母。使令安樂。而得利益。如是之人。見安樂故。便合設福。答諸土地。翻爲殺害。聚集眷屬。以是之故。犯殃自受。子母俱損。又閻浮提。臨命終人。不問善惡。我欲令是命終之人。不落惡道。何況自修善根。增我力故。是閻浮提。行善之人。臨命終時。亦有百千惡道鬼神。或變作父母。乃至諸眷屬。引接亡人。令落惡道。何況本造惡者。世尊。如是閻浮提男子女人。臨命終時。神識昏昧。不辯善惡。乃至眼耳。更無見聞。是諸眷屬。當須設大供養。轉讀尊經。念佛菩薩名號。如是善緣。能令亡者。離諸惡道。諸魔鬼神。悉皆退散。世尊。一切衆生。臨命終時。若得聞一佛名。一菩薩名。或大乘經典。一句一偈。我觀如是輩人。除五無間殺害之罪。小小惡業。合墮惡趣者。尋卽解脫。佛告主命鬼王。汝大慈故。能發如是大願。於生死中。護諸衆生。若未來世中。有男子女人。至生死時。汝莫退是願。總令解脫。永得安樂。鬼王白佛言。願不有慮。我畢是形。念念擁護閻浮衆生。生時死時。俱得安樂。但願諸衆生。於生死時。信受我語。無不解脫。獲大利益。爾時佛告地藏菩薩。是大鬼王主命者。已曾經百千生。作大鬼王。於生死中。擁護衆生。是大士慈悲願故。現大鬼身。實非鬼也。卻後過一百七十劫。當得成佛。號曰無相如來。劫名安樂。世界名淨住。其佛壽命。不可計劫。地藏。是大鬼王。其事如是。不可思議。所度人天。亦不可限量。

地藏菩薩本願經卷中 經本經大正藏本。分爲上下兩卷。自初利天宮神通品第一。至如來讚歎品第六。爲上卷。利益存亡品第七。至囑累人天品第十三。爲下卷。茲據上海佛經流通處本。互爲校訂。三頁二行。廣設。大作廣說。十一頁末行。名曰到首。大作名爲到首。十九頁四行。生人天中。大作生天人中。二十一頁三行。聚集。大作集聚。二十六頁末行。受勝妙樂。是人眷屬。如有福力。已生人天。十六字。大無。

地藏菩薩本願經卷下

唐于闐國三藏沙門實叉難陀譯

稱佛名號品第九

爾時地藏菩薩摩訶薩白佛言。世尊。我今爲未來衆生。演利益事。於生死中。得大利益。唯願世尊。聽我說之。佛告地藏菩薩。汝今欲興慈悲。救拔一切罪苦六道衆生。演不思議事。今正是時。唯當速說。吾卽涅槃。使汝早畢。是願。吾亦無憂。現在未來。一切衆生。地藏菩薩白佛言。世尊。過去無量阿僧祇劫。有佛出世。號無邊身如來。若有男子女人。聞是佛名。暫生恭敬。卽得超越四十劫生死重罪。何況塑畫形像。供養讚歎。其人獲福。無量無邊。又於過去恆河沙劫。有佛出世。號寶性如來。若有男子女人。聞是佛名。一彈指頃。發心歸依。是人於無上道。永不退轉。又於過去。有佛出世。號波頭摩勝如來。若有男子女人。聞是佛名。歷於耳根。是人當得千返生於六欲天中。何況志心稱念。又於過去。不可說不可說阿僧祇劫。有佛出世。號師子吼如來。若有男子女人。聞是佛名。一念歸依。是人得遇無量諸佛。摩頂授記。又於過去。有佛出世。號拘留孫佛。若有男子女人。聞是佛名。志心瞻禮。或復讚歎。是人於賢劫千佛會中。爲大梵王。得授上記。又於過去。有佛出世。號毗婆尸。若有男子女人。聞是佛名。永不墮惡道。常生人天。受勝妙樂。又於過去無量無數恆河沙劫。有佛出世。號寶勝如來。若有男子女人。聞是佛名。畢竟不墮惡道。常在天上。受勝妙樂。又於過去。有佛出世。號寶相如來。若有男子女人。聞是佛名。生恭敬心。是人不久得阿羅漢果。又於過去無量

阿僧祇劫。有佛出世。號袞袞幢如來。若有男子女人。聞是佛名者。超一百大劫生死之罪。又於過去。有佛出世。號大通山王如來。若有男子女人。聞是佛名者。是人得遇恆河沙佛。廣爲說法。必成菩提。又於過去。有淨月佛。山王佛。智勝佛。淨名王佛。智成就佛。無上佛。妙聲佛。滿月佛。月面佛。有如是等不可說佛。世尊。現在未來。一切衆生。若天若人。若男若女。但念得一佛名號。功德無量。何況多名。是衆生等。生時死時。自得大利。終不墮惡道。若有臨命終人。家中眷屬。乃至一人。爲是病人。高聲念一佛名。是命終人。除五無間罪。餘業報等。悉得消滅。是五無間罪。雖至極重。動經億劫。了不得出。承斯臨命終時。他人爲其稱念佛名。於是罪中。亦漸消滅。何況衆生。自稱自念。獲福無量。滅無量罪。

校量布施功德緣品第十

爾時地藏菩薩摩訶薩。承佛威神。從座而起。胡跪合掌。白佛言。世尊。我觀業道衆生。校量布施。有輕有重。有一生受福。有十生受福。有百生千生受大福利者。是事云何。唯願世尊。爲我說之。爾時佛告地藏菩薩。吾今於忉利天宮。一切衆會。說閻浮提布施。校量功德輕重。汝當諦聽。吾爲汝說。地藏白佛言。我疑是事。願樂欲聞。佛告地藏菩薩。南閻浮提。有諸國王。宰輔大臣。大長者。大刹利。大婆羅門等。若遇最下貧窮。乃至癯殘瘠瘦。聲癡無目。如是種種不完具者。是大國王等。欲布施時。若能具大慈悲。下心含笑。親手徧布施。或使人施。軟言慰喻。是國王等。所獲福利。如布施百恆河沙佛功德之利。何以故。緣是國王等。於是最貧賤。及不完具者。發大慈心。是故福利。有如此報。百千生中。常得七寶具足。何況衣食受用。復次地藏。

若未來世。有諸國王。至婆羅門等。遇佛塔寺。或佛形像。乃至菩薩聲聞辟支佛像。躬自營辦。供養布施。是國王等。當得三劫。爲帝釋身。受勝妙樂。若能以此布施福利。迴向法界。是大國王等。於十劫中。常爲大梵天王。復次地藏。若未來世。有諸國王。至婆羅門等。遇先佛塔廟。或至經像。毀壞破落。乃能發心修補。是國王等。或自營辦。或勸他人。乃至百千人等。布施結緣。是國王等。百千生中。常爲轉輪王身。如是他人。同布施者。百千生中。常爲小國王身。更能於塔廟前。發迴向心。如是國王。乃及諸人。盡成佛道。以此果報。無量無邊。復次地藏。未來世中。有諸國王。及婆羅門等。見諸老病。及生產婦女。若一念間。具大慈心。布施醫藥。飲食臥具。使令安樂。如是福利。最不思議。一百劫中。常爲淨居天主。二百劫中。常爲六欲天主。畢竟成佛。永不墮惡道。乃至百千生中。耳不聞苦聲。復次地藏。若未來世中。有諸國王。及婆羅門等。能作如是布施。獲福無量。更能迴向。不問多少。畢竟成佛。何況釋梵轉輪之報。是故地藏。普勸衆生。當如是學。復次地藏。未來世中。若善男子。善女人。於佛法中。種少善根。毛髮沙塵等許。所受福利。不可爲喻。復次地藏。未來世中。若有善男子。善女人。遇佛形像。菩薩形像。辟支佛形像。轉輪王形像。布施供養。得無量福。常在人天。受勝妙樂。若能迴向法界。是人福利。不可爲喻。復次地藏。未來世中。若有善男子。善女人。遇大乘經典。或聽聞一偈一句。發殷重心。讚歎恭敬。布施供養。是人獲大果報。無量無邊。若能迴向法界。其福不可爲喻。復次地藏。若未來世中。有善男子。善女人。遇佛塔寺。大乘經典。新者。布施供養。瞻禮讚歎。恭敬合掌。若遇故者。或毀壞者。修補營理。或獨發心。或勸多人。同共發心。如是等輩。三十生中。常爲諸小國王。檀越之人。常

爲輪王。還以善法教化諸小國王。復次地藏。未來世中。若有善男子善女人。於佛法中。所種善根。或布施供養。或修補塔寺。或裝理經典。乃至一毛一塵。一沙一涕。如是善事。但能迴向法界。是人功德。百千生中。受上妙樂。如但迴向自家眷屬。或自身利益。如是之果。卽三生受樂。捨一得萬報。是故地藏。布施因緣。其事如是。

地神護法品第十一

爾時堅牢地神白佛言。世尊。我從昔來。瞻視頂禮。無量菩薩摩訶薩。皆是大不可思議神通智慧。廣度衆生。是地藏菩薩摩訶薩。於諸菩薩誓願深重。世尊。是地藏菩薩。於閻浮提。有大因緣。如文殊。普賢。觀音。彌勒。亦化百千身形。度於六道。其願尙有畢竟。是地藏菩薩。教化六道一切衆生。所發誓願劫數。如千百億恆河沙。世尊。我觀未來及現在衆生。於所住處。於南方清潔之地。以土石竹木。作其龕室。是中能塑畫。乃至金銀銅鐵。作地藏形像。燒香供養。瞻禮讚歎。是人居處。卽得十種利益。何等爲十。一者。土地豐壤。二者。家宅永安。三者。先亡生天。四者。現存益壽。五者。所求遂意。六者。無水火災。七者。虛耗辟除。八者。杜絕惡夢。九者。出入神護。十者。多遇聖因。世尊。未來世中。及現在衆生。若能於所住處方面。作如是供養。得如是利益。復白佛言。世尊。未來世中。若有善男子善女人。於所住處。有此經典。及菩薩像。是人更能轉讀經典。供養菩薩。我常日夜。以本神力。衛護是人。乃至水火盜賊。大橫小橫。一切惡事。悉皆消滅。佛告堅牢地神。汝大神力。諸神少及。何以故。閻浮土地。悉蒙汝護。乃至草木沙石。稻麻竹葦。穀米寶貝。從地而有。皆因汝力。

又當稱揚地藏菩薩利益之事。汝之功德。及以神通。百千倍於常分地神。若未來世中。有善男子善女人。供養菩薩。及轉讀是經。但依地藏本願經一事修行者。汝以本神力而擁護之。勿令一切災害。及不如意事。輒聞於耳。何況令受。非但汝獨護是人故。亦有釋梵眷屬。諸天眷屬。擁護是人。何故得如是聖賢擁護。皆由瞻禮地藏形像。及轉讀是本願經故。自然畢竟出離苦海。證涅槃樂。以是之故。得大擁護。

見聞利益品第十二

爾時世尊。從頂門上。放百千萬億大毫相光。所謂白毫相光。大白毫相光。瑞毫相光。大瑞毫相光。玉毫相光。大玉毫相光。紫毫相光。大紫毫相光。青毫相光。大青毫相光。碧毫相光。大碧毫相光。紅毫相光。大紅毫相光。綠毫相光。大綠毫相光。金毫相光。大金毫相光。慶雲毫相光。大慶雲毫相光。千輪毫光。大千輪毫光。寶輪毫光。大寶輪毫光。日輪毫光。大日輪毫光。月輪毫光。大月輪毫光。宮殿毫光。大宮殿毫光。海雲毫光。大海雲毫光。於頂門上。放如是等毫相光。已。出微妙音。告諸大眾。天龍八部。人非人等。聽吾今日。於忉利天宮。稱揚讚歎地藏菩薩。於人中。利益等事。不思議事。超聖因事。證十地事。畢竟不退阿耨多羅三藐三菩提事。說是語時。會中有一菩薩摩訶薩。名觀世音。從座而起。胡跪合掌。白佛言。世尊。是地藏菩薩摩訶薩。具大慈悲。憐愍罪苦衆生。於千萬億世界。化千萬億身。所有功德。及不思議威神之力。我聞世尊與十方無量諸佛。異口同音。讚歎地藏菩薩云。正使過去現在未來諸佛。說其功德。猶不能盡。向者又蒙世尊。普告大眾。欲稱揚地藏利益等事。唯願世尊。爲現在未來一切衆生。稱揚地藏不思議事。令天龍八部。

瞻禮獲福。佛告觀世音菩薩。汝於娑婆世界。有大因緣。若天若龍。若男若女。若神若鬼。乃至六道罪苦衆生。聞汝名者。見汝形者。戀慕汝者。讚歎汝者。是諸衆生。於無上道。必不退轉。常生人天。具受妙樂。因果將熟。遇佛授記。汝今具大慈悲。憐愍衆生。及天龍八部。聽吾宣說地藏菩薩不思議利益之事。汝當諦聽。吾今說之。觀世音言。唯然。世尊。願樂欲聞。佛告觀世音菩薩。未來現在諸世界中。有天人受天福盡。有五衰相現。或有墮於惡道之者。如是天人。若男若女。當現相時。或見地藏菩薩形像。或聞地藏菩薩名。一瞻一禮。是諸天人。轉增天福。受大快樂。永不墮三惡道報。何況見聞菩薩。以諸香華衣服飲食寶貝瓔珞。布施供養。所獲功德福利。無量無邊。復次觀世音。若未來現在諸世界中。六道衆生。臨命終時。得聞地藏菩薩名。一聲。歷耳根者。是諸衆生。永不歷三惡道苦。何況臨命終時。父母眷屬。將是命終人。舍宅財物。寶貝衣服。塑畫地藏形像。或使病人。未終之時。眼耳見聞。知道眷屬。將舍宅寶貝等。爲其自身。塑畫地藏菩薩形像。是人若是業報。合受重病者。承斯功德。尋卽除愈。壽命增益。是人若是業報命盡。應有一切罪障業障。合墮惡趣者。承斯功德。命終之後。卽生人天。受勝妙樂。一切罪障。悉皆消滅。復次觀世音菩薩。若未來世。有男子女人。或乳哺時。或三歲五歲十歲已下。亡失父母。乃及亡失兄弟姊妹。是人年既長大。思憶父母。及諸眷屬。不知落在何趣。生何世界。生何天中。是人若能塑畫地藏菩薩形像。乃至聞名。一瞻一禮。一日至七日。莫退初心。聞名見形。瞻禮供養。是人眷屬。假因業故。墮惡趣者。計當劫數。承斯男女兄弟姊妹。塑畫地藏形像。瞻禮功德。尋卽解脫。生人天中。受勝妙樂。是人眷屬。如有福力。已生人天。受勝妙樂者。卽承

斯功德。轉增聖因。受無量樂。是人更能三七日中。一心瞻禮地藏形像。念其名字。滿於萬徧。當得菩薩。現無邊身。具告是人。眷屬生界。或於夢中。菩薩現大神力。親領是人。於諸世界。見諸眷屬。更能每日念菩薩名千徧。至於千日。是人當得菩薩遺所在。土地鬼神。終身衛護。現世衣食豐溢。無諸疾苦。乃至橫事不入其門。何況及身。是人畢竟得菩薩摩頂授記。復次觀世音菩薩。若未來世。有善男子。善女人。欲發廣大慈心救度一切衆生者。欲修無上菩提者。欲出離三界者。是諸人等。見地藏形像。及聞名者。至心歸依。或以香華衣服。寶貝飲食。供養瞻禮。是善男女等。所願速成。永無障礙。復次觀世音。若未來世。有善男子。善女人。欲求現在未來。百千萬億等願。百千萬億等事。但當歸依瞻禮。供養讚歎。地藏菩薩形像。如有所願。所求悉皆成就。復願地藏菩薩。具大慈悲。永擁護我。是人於睡夢中。即得菩薩摩頂授記。復次觀世音菩薩。若未來世。善男子。善女人。於大乘經典。深生珍重。發不思議心。欲讀欲誦。縱遇明師。教視令熟。旋得旋忘。動經年月。不能讀誦。是善男子等。有宿業障。未得消除。故於大乘經典。無讀誦性。如是之人。聞地藏菩薩名。見地藏菩薩像。具以本心。恭敬陳白。更以香華衣服。飲食一切玩具。供養菩薩。以淨水一盞。經一日一夜。安菩薩前。然後合掌請服。迴首向南。臨入口時。至心鄭重。服水既畢。慎五辛酒肉。邪淫妄語。及諸殺害。一七日。或三七日。是善男子。善女人。於睡夢中。具見地藏菩薩。現無邊身。於是人處。授灌頂水。其人夢覺。即獲聰明。應是經典。一歷耳根。即當永記。更不忘失。一句一偈。復次觀世音菩薩。若未來世。有諸人等。衣食不足。求者乖願。或多病疾。或多凶衰。家宅不安。眷屬分散。或諸橫事。多來忤身。睡夢之間。多有驚怖。如

是人等。聞地藏名。見地藏形。至心恭敬。念滿萬徧。是諸不如意事。漸漸消滅。卽得安樂。衣食豐溢。乃至於睡夢中。悉皆安樂。復次觀世音菩薩。若未來世。有善男子善女人。或因治生。或因公私。或因生死。或因急事。入山林中。過渡河海。乃及大水。或經險道。是人先當念地藏菩薩名萬徧。所過土地鬼神衛護。行住坐臥。永保安樂。乃至逢於虎狼師子。一切毒害。不能損之。佛告觀世音菩薩。是地藏菩薩。於閻浮提。有大因緣。若說於諸衆生。見聞利益等事。百千劫中。說不能盡。是故觀世音。汝以神力。流布是經。令娑婆世界衆生。百千萬劫。永受安樂。爾時世尊。而說偈言。

吾觀地藏威神力	恆河沙劫說難盡	見聞瞻禮一念間	利益人天無量事
若男若女若龍神	報盡應當墮惡道	至心歸依大士身	壽命轉增除罪障
少失父母恩愛者	未知魂神在何趣	兄弟姊妹及諸親	生長以來皆不識
或塑或畫大士身	悲戀瞻禮不暫捨	三七日中念其名	菩薩當現無邊體
示其眷屬所生界	縱墮惡趣尋出離	若能不退是初心	卽獲摩頂受聖記
欲修無上菩提者	乃至出離三界苦	是人既發大悲心	先當瞻禮大士像
一切諸願速成就	永無業障能遮止	有人發心念經典	欲度羣迷超彼岸
雖立是願不思議	旋讀旋忘多廢失	斯人有業障惑故	於大乘經不能記
供養地藏以香華	衣服飲食諸玩具	以淨水安大士前	一日一夜求服之

發殷重心。慎五辛。酒肉邪淫及妄語。三七日內勿殺害。至心思念大士名。即於夢中見無邊。覺來便得利根耳。應是經教歷耳聞。千萬生中永不忘。以是大士不思議。能使斯人獲此慧。貧窮衆生及疾病。家宅凶衰眷屬離。睡夢之中悉不安。求者乖違無稱遂。至心瞻禮地藏像。一切惡事皆消滅。至於夢中盡得安。衣食豐饒神鬼護。欲入山林及渡海。毒惡禽獸及惡人。惡神惡鬼并惡風。一切諸難諸苦惱。但當瞻禮及供養。地藏菩薩大士像。如是山林大海中。應是諸惡皆消滅。觀音至心聽吾說。地藏無盡不思議。百千萬劫說不周。廣宣大士如是力。地藏名字人若聞。乃至見像瞻禮者。香華衣服飲食奉。供養百千受妙樂。若能以此迴法界。畢竟成佛超生死。是故觀音汝當知。普告恆沙諸國土。

囑累人天品第十三

爾時世尊舉金色臂。又摩地藏菩薩摩訶薩頂。而作是言。地藏地藏。汝之神力。不可思議。汝之慈悲。不可思議。汝之智慧。不可思議。汝之辯才。不可思議。正使十方諸佛讚歎宣說。汝之不思議事。千萬劫中不能得盡。地藏地藏。記吾今日。在忉利天中。於百千萬億。不可說不可說。一切諸佛菩薩。天龍八部。大會之中。再以人天諸衆生等。未出三界。在火宅中者。付囑於汝。無令是諸衆生。墮惡趣中。一日一夜。何況更落五

無間。及阿鼻地獄。動經千萬億劫。無有出期。地藏。是南閻浮提衆生。志性無定。習惡者多。縱發善心。須臾卽退。若遇惡緣。念念增長。以是之故。吾分是形。百千億化度。隨其根性。而度脫之。地藏。吾今慇懃。以天人衆。付囑於汝。未來之世。若有天人。及善男子善女人。於佛法中。種少善根。一毛一塵。一沙一蒂。汝以道力。擁護是人。漸修無上。勿令退失。復次地藏。未來世中。若天若人。隨業報應。落在惡趣。臨墮趣中。或至門首。是諸衆生。若能念得一佛名。一菩薩名。一句一偈。大乘經典。是諸衆生。汝以神力。方便救拔。於是人所。現無邊身。爲碎地獄。遣令生天。受勝妙樂。爾時世尊。而說偈言。

現在未來天人衆 吾今慇懃付囑汝 以大神通方便度 勿令墮在諸惡趣

爾時地藏菩薩摩訶薩。胡跪合掌。白佛言。世尊。唯願世尊。不以爲慮。未來世中。若有善男子善女人。於佛法中。一念恭敬。我亦百千方便。度脫是人。於生死中。速得解脫。何況聞諸善事。念念修行。自然於無上道。永不退轉。說是語時。會中有一菩薩。名虛空藏。白佛言。世尊。我自至忉利。聞於如來讚歎地藏菩薩威神勢力。不可思議。未來世中。若有善男子善女人。乃及一切天龍。聞此經典。及地藏名字。或瞻禮形像。得幾種福利。唯願世尊。爲未來現在一切衆等。略而說之。佛告虛空藏菩薩。諦聽諦聽。吾當爲汝。分別說之。若未來世。有善男子善女人。見地藏形像。及聞此經。乃至讀誦。香華飲食。衣服珍寶。布施供養。讚歎瞻禮。得二十八種利益。一者。天龍護念。二者。善果日增。三者。集聖上因。四者。菩提不退。五者。衣食豐足。六者。疾疫不臨。七者。離水火災。八者。無盜賊厄。九者。人見欽敬。十者。神鬼助持。十一者。女轉男身。十二者。爲王臣女。

十三者端正相好。十四者多生天上。十五者或為帝王。十六者宿智命通。十七者有求皆從。十八者眷屬歡樂。十九者諸橫消滅。二十者業道永除。二十一者去處盡通。二十二者夜夢安樂。二十三先亡離苦。二十四者宿福受生。二十五者諸聖讚歎。二十六者聰明利根。二十七者饒慈愍心。二十八者畢竟成佛。復次虛空藏菩薩。若現在未來。天龍鬼神。聞地藏名。禮地藏形。或聞地藏本願事行。讚歎瞻禮。得七種利益。一者速超聖地。二者惡業消滅。三者諸佛護臨。四者菩提不退。五者增長本力。六者宿命皆通。七者畢竟成佛。爾時十方一切如來。不可說不可說諸佛如來。及大菩薩。天龍八部。聞釋迦牟尼佛。稱揚讚歎地藏菩薩。大威神力。不可思議。歎未曾有。是時切利天。雨無量香華。天衣珠璣。供養釋迦牟尼佛。及地藏菩薩。已一切聚會。俱復瞻禮。合掌而退。

地藏菩薩本願經卷下

略注 ○地藏菩薩本願經。簡稱地藏本願經。名地藏者。謂安忍不動。如大地。靜慮深密。如秘藏也。切利天。欲界六天之第二天。譯為三十三天。切骨刀。乘義章云。以體寂靜。離於邪亂。故名三昧。如是我們。結集此經之阿難者。自稱。以明佛所說如是經典。為我所親聞。而非傳述也。一見濁。邪見紛起。不修善道。不畏果報。二見濁。邪見紛起。不修善道。三煩惱濁。多諸愛欲。惱亂心神。四命濁。惡業增盛。壽命短促。五劫濁。時當滅劫。人壽日減。饑饉。疾疫。刀兵等災。相繼而起。般若智慧之義。般讀若鉢。王。增長天王。廣目天王。多聞天王所居。

智慧論云。般若者。秦言智慧。一切諸智之天也。噉音淡。與啖同。吃食也。法慧中。最為第一。無上無比。無等。更無王子。佛為法王。菩薩紹隆佛種。故稱法王子。亦曰三摩地。正定之義。大對於已登佛位之果地。而稱菩薩修行之位也。十地。進修佛道之十階級也。相好。相。謂佛身各部殊妙之相。好。謂相之微細者。以其甚可愛悅。故曰好。不可說。大數名。阿僧祇。梵語。大數名。像法時。像者類似之義。但有教法。而無行證者為末法時。三寶。佛法僧之稱。

縣中人。由是咸生信仰。地祇靈威錄。唐別駕傅。信心清淨。奉法為旨。一日問僧。在家居士。將事何佛菩薩。諸佛異辭。有云。宜事地祇。受佛勅故。健滿自念。既受佛勅。豈捨我等。即求悔悟。造三寸像。龍於臂中。行往坐臥。稱念名號。莊嚴天成。天下兵亂。健滿被圍。受死須臾。即念地祇。大將策騎。驚惶捨去。兵亂平後。語此因緣。聞者歎異。長與年中。赴任所。怨家聞之。欲加刑害。伏路以待。只見沙門。過往。都不見。悔謝怨解。又途中夜宿。天降大雨。燈火都滅。醫中聖像。放光如晝。忽有微音。如幼人曰。早去。即驚異。以光前導。去宿別處。明日洪水大起。宿所深陷。水底自知地祇菩薩救護。清泰二年。行年七十八歲方卒。臨光時。指天升去。同上。

曹宗清女士。號雲才。吳縣人。自記其母夫人潘氏。病歷三年餘。戊辰春益治。全中履。醫言。此症名氣虛中滿。須俟腹中水疏盡。方得命終。已無法可治。時余任職申江。月一回省。四月歸。見母病皮之危。號痛之聲。不絕於耳。余悲有破分。因求治法於信佛之友。承闍度持地祇本願經。以救母病。最能感應。余即日發願。誦地藏經三十卷。持齋三月。如得老母。隨消病愈。當終身奉佛。至五月二十七日上來劫。度地獄衆生。至五月二十七日上

午。誦經圓滿。是日午後。余母即小便狂瀉。歷半日一夜乃止。聖家驚怪。事。謂何料必不起。乃醫者診後。說言怪事。謂得七十三歲久病之老人。有此強力。能打通便門。善排積滯。此病不尤當愈矣。果再經二三日。昔之皮膚光亮者。變為枯皺。全體腫消。宿病良已。孟雲台記。同上。魏錢甫。邵陽人。民國元年。寓天津河北。望海樓後。其胡同。忽逢津地兵亂。與妻商議。命乳媪照料兩兒。命府役閉門。不可出聲。兩人至佛堂。燃香燭。對誦地藏菩薩本願經。直至市面平靜。鄰居扣門來告。事者。其左右鄰居。皆有亂兵扣門。大內。謂非仗菩薩成神之力。曷克如此耶。魏真安記。亂世瑣山。

地藏菩薩本願經卷下 附錄 印光法師嘉言 勸世文

忍辱柔和是妙方。終身安分度時光。莫煩作事好商量。耐煩作事好商量。每見剛刀口易傷。招德多為恨心腸。彼此何須論短長。勾欄馬路免無妨。退讓三分也不妨。秋風又見菊花黃。富貴還同九月霜。酸甘若辣自承當。天自從容定主張。公自絲毫命即亡。蠶為絲直命早亡。兩鍾和氣二陳湯。死後空持手一雙。富貴窮通日日忙。不知何處是家鄉。

慈山大師

學佛要旨

佛法緣起 釋迦如來成佛道時。微見一切眾生。念心性。與佛無二無別。唱然歎曰。奇哉奇哉。一切眾生。皆有如來智慧。但以妄想執著。不能證得。若離妄想。則一切智。無礙智。立能證得。由是隨順。則宜說種種法。無非令其斷除妄想執著。以復其本有心性而已。

淨土法門。然眾生根機不一。若非宿業成熟。斷難現生斷惑證真。出離生死。於是特開一信願念佛。求生淨土法門。俾一切上中下根眾生。同於現生。仗佛慈力。往生西方。無論惑業之斷與未斷。及工夫之深淺。善根之大小。罪惡之輕重。但具真信切願。無一不得往生。既生西方。則惑業不期斷而自斷。福慧不期圓而自圓。

念佛效果 為什麼諸佛。諸大乘經。諸大祖師法師。善知識。皆以念佛一事為宏法利生第一要務。是因為人皆有佛性。其本性所以未明者。由煩惱惑業蒙蔽也。猶如一面古銅鏡子。鏡面堆積塵垢。自然模糊。不能照人。須日日擦之。久久塵垢去盡。光明豁然顯露了。人能恭敬念佛。念念掃盡妄念。心地自然光明。所以念佛是發顯人人本具佛性。感佛接引。往生西方。念佛法門。最捷要方法。觀像。觀想。實相念佛。念佛分持名。觀像。觀想。實相四種。修成一種。都能往生淨土。其中只有持名念佛一法。念「南無阿彌陀佛」

六字或「阿彌陀佛」四字均可。收機最廣。下手最易。如果念到一心不亂。那實相妙理。也會全體顯露。西方妙境。便得徹見。圓彰。即持名而觀。證實不作。觀而徹見。西方。可謂最方便。最圓頓的了。念佛高聲。有高聲念。有金剛持。如念佛高聲。過於唇齒之間。這叫做金剛持。却又不能執定。或覺費力。就不妨默念。或覺昏沉。就從心起。聲從口出。再從耳入。心口念得清清楚楚。耳根聽得清清楚楚。不要貪多求速。務期大小心不亂。行住坐臥都可念。但在臥時。或大小便不淨處。只可默念不可出聲。若能念到於一切時。心不離佛。佛不離心。無來雜。無間斷。不昏不亂。就到「事一心」的境界。更能夠究到「法法皆如」。心佛不二。道清淨。無有一相。就到了「理一心」的境界。能做到「事一心」。往生可必。兼能「理一心」。即未到「事一心」。也得往生。助行 除念佛之外。還要從事於此惡修善等的修持。觀無量壽經說。一欲生彼國。者當修三福。一者孝養父母。承事師長。慈心不殺。修十善業。二者發菩提心。深信因果。讀誦大乘。勸進行者。是為三世諸佛淨業正因。當然要生淨土。那可不求身口意三業清淨。就是這個意思。所以修淨業的人。應該諸惡莫作。眾善奉行。

敦倫盡分。閑邪存誠。一切存心做人。都要以佛菩薩聖賢為師。這是淨業的助行。和念佛的正行。正如車之兩輪。缺一不可。可。

早晚功課 除隨時念佛念經（在本書中可任擇一經。或二經三經兼念）外。每日晨夕須規定時間。依本書底頁所載念誦儀辭。做簡易早晚功課。祇要天天做。有恆心。久而久之。就自然而成了習慣。好像是每天的工作一樣。非做不可了。

回向 凡念佛念經及做任何功德。舉。即要回向。力量更充。功德。回向文可用本書底頁佛教簡易早晚功課。後所舉者。現力愈大。結果愈大。願力既無。果從何來。願。

普賢菩薩十大願王 阿彌陀佛四十八願。地藏菩薩。衆生度盡。方證菩提。地獄不空。誓不成佛。所以念佛之人。亦當發大願心。可得即生了生死之實益。

防終 人隨命終時。心中不亂。最為緊要。關鍵。彌陀經上說。一若人念佛。心不亂。隨命終時。心不顛倒。阿彌陀佛與諸菩薩。前來接引。往生西方。在平時發願。堅切。念佛。具有實在功夫。到臨命終時。方才有把握。念不為邪境所移。此時眷屬當為同聲助念。令其正念現前。自可隨佛往生。若一被動哭泣。令生痛苦。繫戀。每致失却正念。為害甚大。又在剛死不久。時時痛楚。未與眾凡掛身。換衣等。均所切忌。人身難得。今已得。佛法難聞。今已聞。此身不向今生度。更待何生度。此身。

2
101042

2

非賣品

願以此功德 莊嚴佛淨土
普度諸含識 消災延福壽

茅 敬贈
證因 賢壽

民國卅七年九月再版

代贈處 大法輪書局
上海南京西路 四五一弄三號
商務印書館總務股
上海 河南路